



Today

INSAIT:
PNG Yut i go long Siapan
INDEX - P6

MCCI helpim Water Rats daunim stil pasin - P8

Praim Minista kik - ov

MI TRAIM KIK: Praim Minista Peter O'Neill i kik ov long bikpela ragbi pilai namel long NGCB PNG PMs 13 na Australia PMs 13. Lukim ol poto long Pes 27. Poto Nicky Bernard.



Ol Fiji go sekim Snax faktori long Lae

OL teknikel opisa bilong Fiji na PNG i go long Lae asde (Trinde) long mekim Impot Risk Asemen bilong Trukai Rais na Snax Bisket.

Ol opisa i bin go lukluk raun long faktori bilong Trukai Industries Limited na Lae Biscuit Company Limited long Lae long asde bihain long ol i bin go lukluk raun long faktori bilong Hugo Canning Company Limited long 15-Mail ausait long Pot Mosbi.

Hugo Canning em i kampani bilong wokim namba wan buli bif bilong PNG, Ox & Palm tin mit. Trukai Industries i save wokim Trukai rais na Lae Biscuit Company i save wokim Snax bisket.

Delegesen bilong Fiji i bin gat Tred Komisina bilong Fiji i kam long PNG, Navalai Tuivuniwai, Sif

Veterinarian, Dokta Sian Watson, Sif Plent Proteksen Opisa, Nilesh Ami Chand na Ronal Prasad, husat i tim lida bilong Tred Fesilitesen na Komplaiens.

Teknikel tim bilong PNG bin lukim ol tim memba i kam long NAQIA, Dipatmen ov Tred, Komes na Indastri, Dipatemen ov Egrikalsa na Laivstok, wan wan ol mausman bilong kampani husat i save mekim Ox & Palm Mit, Snax Bisket and Trukai Rais, na arapela ol gavman opisal.

PNG i bin laik salim Ox & Palm tin mit, Trukai rais na Snax bisket i go long Fiji tasol Fiji i les long kisim ol dispela prodak bilong PNG bikos ol i tok baiosekuriti bilong PNG i no strong tumas.

Baiosekuriti em i sekuriti bilong

ol kaikai na ol enimal we dispela sekyuriti bai helpim ol manmeri

I no ken kisim sik taim ol kisim dispela kaikai.

Fiji i bin tok baiosekyuriti sistem bilong PNG i no strong tumas, na ol i les long baim Ox & Palm tin mit, Trukai rais na Snax bisket nogut ol manmeri long hap i kisim sik taim ol i kaikai ol dispela kaikai i kam long PNG.

Minista bilong Tred, Komes na Indastri, Richard Maru, i bin toktok strong long Palamen na long midia long long stopim tred namel long Fiji na PNG bihain long Fiji i les long larim ol dispela prodak i stap long maket bilong ol.

Fiji Minista bilong Indastri, Tred na Turisim, Faiyaz Siddiq Koya, i tok Fiji i les long stopim tred na in-

vesmen wantaim PNG na em i salim ol teknikel opisa i kam long PNG long stretim toktok wantaim PNG Gavman opisal na skelim faktori bilong ol dispela prodak.

Ol teknikel opisa bilong Fiji bihainim toktok bilong Gavman bilong Fiji na ol i kam long kantri long las wiken long stretim dispela hevi na larim tupela kantri i bihainim Fri Tred Agrimen bilong Melanesian Spearhead Group (MSG), we tupela Fiji na PNG wantaim i memba long en.

Mista Maru i tok long 10 yia olgeta, Fiji i bin les long larim PNG i salim Ox & Palm tin mit i go long Fiji maket.

"Fiji i bin tok baiosekyuriti em i as tru long ol i les long larim Ox & Palm i go long maket bilong ol.

Mipela i mas stretim dispela hevi na larim Ox & Palm tin mit na arapela prodak bilong PNG i go stap long maket bilong Fiji," Mista Maru i tok.

Mista Maru i tok PNG i laik salim planti prodak i go long maket bilong Fiji na long maket bilong arapela kantri insait long Pasifik rijon we ol i no save salim ol prodak bilong PNG.

"Ol kampani bilong PNG husat i save wokim ol prodak bilong kantri biong yumi olsem Ox & Palm i ken salim ol prodak i go long Fiji maket taim mipela i stretim ol samting bilong baiosekyuriti," em i tok.

Mista Maru i tok tenkyu long Gavman bilong Fiji long larim ol teknikel opisa bilong Fiji i kam lukluk raun long ol faktori long Lae na Pot Mosbi.

Also available in 200g

GROWN FOR THE PEOPLE OF PNG

Oposisen Lida: Putim ol pailot go bek long wok

OPOSISEN Lida Don Polye i askim ol bod na menesmen bilong Air Niugini long putim sefti bilong ol pasindia o kastoma bilong balus i go pas, na putim ol 8-pela senia pailot i go bek gen long wok.

Mista Polye i mekim dispela toktok bihain long Air Niugini i bin rausim 8-pela pailot bikos ol i bin kamapim sampela toktok na pasin we bod i no laikim long en.

Mista Polye i tok bod na menesmen bilong Air Niugini i mas putim sefti pastaim bilong ol manmeri na pasindia husat i save yusim balus sevis bilong Air Niugini.

Mista Polye i tok dispela pasin bilong bod na menesmen bilong Air Niugini bai givim moa presa na hat wok long ol arapela pailot taim ol i laik dabolim



OPOSISEN Lida Don Polye

wok bilong dispela ol 8-pela pailot husat i lusim wok.

Em i laikim Minista bilong Pablik Entaprais na Stet Invesmen long lukluk i go insait long dispela hevi na putim ol dispela pailot i go bek gen long wok.

“Sefti bilong ol pasindia bilong Air Niugini em i bikpela samting.

Mipela i mas putim sefti i go pas na mekim gutpela disisen long gutpela bilong dispela balus kampani na long kantri na pipel,” Mista Polye i tok.

Em i tok ol dispela pailot i save wok wantaim gutpela tingting long sevim kantri bilong ol, maski arapela balus kampani long arapela kantri i save laik kisim ol i go aut na givim gutpela wok long ol.

“Air Niugini i save yusim moa mani i kam long ol takis mani ol manmeri bilong dispela kantri i save peim long gavman.

“Air Niugini i save yusim dispela mani long trenim ol pailot, na miles long gavman i westim mani bilong pipel na rausim ol pailot nat-

ing olsem kain,” Mista Polye i tok.

Em i tok ol dispela pailot i gat meri, pikinini na famili bilong ol, na ol i mas wok long lukautim ol.

Mista Polye i askim bod na menesmen bilong Air Niugini long baim sampela ol nupela pat o samting bilong mekim balus i ran gut.

Em i tok sapela ol namba wan samting bilong mekim balus i ran gut i olupela tumas na Air Niugini i mas baim gen dispela ol pat.

Sif Eksektiv Opisa bilong Air Niugini, Simon Foo, i bin tok ol dispela 8-pela pailot i bin brukim lo na pasin bilong wok na bod na menesmen i rausim ol.

Mista Foo i tok ol i bin sakim toktok bilong menesmen na kirapim politikel instability o pilai politiks.

Dabol Selebresen long Sivivi viles

OL viles bilong Wod 7 na Sivivi long Kerema Eben Lokal Level Gavman long Galp provins i bin gat dabol selebresen long 41 indipdens eniveseri, na long opim wanpela nupela futbris.

Wanpela 106 mita fut bris i kisim fanding aninit long Provinsal Sevis impruvmen Program (PSIP) gren long mak bilong K350, 000.

Dispela fut bris bai helpim moa long 600 pipel na tu, long helpim wanpela elementri skul long eria.

Ol pipel i givim nem bilong dispela futbris, long Epeve-Soi we bai bungim Wod 7 na Sivivi viles wantaim Kerema taun long kisim ol besik gavman sevis.

Ol dispela ples i no bin gat bris inap planti yia na dispela i mekim laip i hat moa.

Olsem long taim hai wara o wara tait i save kamap, em i save go long ol ples na ol pipel i save yusim ol kanu na ol dingi long karim ol samting bilong ol i go i kam, o long go long painim sevis.

Planti ol pipel long ples wantaim ol pablik sevan bilong ol bikpela ples na long Kerema taun i bin kam bung aninit long san long lukim opim bilong dispela naispela futbris.

Wanpela lokal kontrakta, Mesaivo Kontrakta i bin wokim dispela bris

aninit long supevaisa bilong teknikal divisen bilong Galp Provinsal Edministresen.

Long taim bilong opim bris Galp Gavana, Havila Kavov, i tok ol pipel i mas kamap papa long dispela bris na lukautim samting we i kamap long mani bilong gavman.

Pastaim long ol i wokim dispela futbris, Mista Kavov i bin givim wanpela Lucas Sawmill to the Sivivi Yunaitet Sios- Tairuma Seket.

Kos bilong Lucas Somil em i K64, 000 na i kam long PSIP bilong Galp Provins.

Ol pipel i tok tenkyu long Gavana Kavov long bringim gutpela sevis long ol bai senisim laip bilong ol.

Long wankain taim, Galp Provinsal Polis Komanda, Silas Wayagure i tokim ol pipel long ol i mas lukautim gut dispela futbris.

Em i givim tok lukaut long ol lain i save kisim spak brus na ol spak man long no ken sindaun long futbris na pretim ol lain i go i kam.

“Polis bai mekim save long ol lain husat i brukim lo, maski mipela i no gat planti man na risos long daunim lo na oda, ol komyuniti na ples mas lukautim gut ol sevis olsem,” Mista Wayagure i tok.

Credit Corp opim nupela estet

CREDIT Corp i opim nupela haus bilong em long Ela Makana mauntenlong Pot Mosbi long las wik Fonde.

Nem bilong dispela haus em i Era Matana Estate na konstraksen kampani Fletcher Morobe Construction i bin kirapim dispela haus.

Jeneral Menensa bilong Credit Corp Propetis, Rennie Wekina, i tok Era Matana Estate i gat tupela stori bilding na dispela tupela bilding i gat 22 ol yunit long putim long rent.

Mista Wekina i tok ol dispela 22 yunit i gat tupela na tripela bedrum apatmen haus.

“Konstraksen wok bilong Era Matana i bin stat long 2015 na pinis long Ogas 2016. Mi laik tok tenkyu long Fletcher Morobe i kirapim gut na pinisim gut dispela eksekutiv residensial bilding,” Mista Wekina i tok.

Em i tok dispela em i wanpela bikpela aset o samting bilong Credit Corp na em bai apim veliu bilong ol seaholda go antap.



Swiming pul na entatenmen eria bilong nupela Era Matana Estate bilong Credit Corp.

Credit Corp, Sir Wilson Kamit, i tok ol bod ov dairekta bilong Credit Corp i wanbel na pasim tok long baim bek gen sampela sea ol i bin salim long Pot Mosbi Stok Eksens (POMSoX).

Mista Kamit i tok stat long Septemba 20, kampani bai baim bek sampela ol sea na dispela baim bek bilong sea bai kamap long 12-pela mun o klostu long wan yia.

Em bai pinis bihain long 12-pela mun na Mista

Kamit i askim ol seaholda long salim gen moa long 5, 000 sea bilong kampani i go bek gen long Credit Corp.

“Credit Corp i laik baim bek ol sea bilong em yet long mani mak K10 milien,” Mista Kamit i tok.

Mista Kamit i tok dispela plen bilong baim bek sea bilong kampani i kamap gut bikos em i helpim ol liklik seaholda taim ol i nosave paim brokis fi long ol stok broka.

BSP Capital Limited na Kina Securities Limited bai kamap yet olsem stok broka long larim ol seaholda i baim bek gen ol sea bilong Credit Corp.

Credit Corp em i wanpela jeneral fainens kampani bilong PNG na ol i listim dispela kampani long Pot Mosbi Stok Eksens (POMSoX). Credit Corp i gat brens long Solomon Ailan, Fiji na Vanuatu.

Ol i tokaut long opim nupela brens tu long Is Timor.

Aitape i stap wankain yet

BIHAIN long 41 yias bilong indipdens, Aitape taun i no lukim wanpela gutpela senis i kamap tasol em i stap wankain yet, wanpela lokal lida i tok.

Aitape Eben LLG Presiden na Taun Meya, Ian Smith Welisai, i tok i no gat wanpela gutpela developmen na senis i kamap long dispela liklik taun bilong Wes Sepik bikos ol rot na bris, ol skul na haus sik, na arapela ol gavman sevis i no stap gut.

Mista Welisai i tok ol rot na bris insait long Aitape distrik i no stap gut na em i laikim gavman long kirapim gen dispela tupela namba wan sevis long larim ol pipel i kisim gutpela sevis na tu long larim ol investa i kam insait na mekim bisnis.

“Ol rot na bris bilong mipela i bagarap na i luk olsem gavman i no wari long o pipel,” em i tok.

Em i tok rot na bris bilong Sepik Haiwe long Wes Sepik sait i no stap gut bikos i no gat gutpela bris na long sampela hap namel long rot, i no gat bris na ol kar i save brukim wara.

Mista Welisai i tok ol PMV draiva na ol man husat i gat kar i save lukim kar bilong ol i bagarap hariap insait long 7-pela mun bikos kondisen bilong rot i no gutpela long larim kar i ran gut na stap gut longpela taim.

“Nupela kar stret ol i kisim kam aut long Ela Motors i save bagarap hariap bihain long 6-pela o 7-pela mun. Ol laip bilong ol pasindia tu i no save stap gut taim kari i save ran long dispela kain rot nogut,” Mista Welisai i tok.



Meya bilong Aitape Taun, Ian Smith Welisai

Em i tok Aitape i nidim tripela sevis long helpim ol manmeri na dispela em ol, rot na bris, ples balus na sip bris.

“Dispela em ol tripela namba wan sevis gavman i mas givim long ol pipel bilong Aitape. Ol arapela gavman sevis bai kam bihain baksait long gutpela rot na bris, gutpela ples balus na gutpela sip bris,” Mista Welisai i tok.

Tresera Patrick Pruaitch em i memba bilong Aitape-Lumi open ilektoret. Dispela em i tripela tem or 15 yia bilong em i stap memba bilong Aitape-Lumi.

Insait long dispela 15 yia, Mista Pruaitch i bin holim oposisen bilong senia gavman minista.

Wanpela namba wan polisi bilong Gavman em long putim moa mani long kirapim rot na bris, ples balus na sip bris.

IPA bos Pomaleu risain na Hoot kisim ples

NUPELA ekting Menesing Dairekta bilong Investment Promotion Authority (IPA), em i Clarence Hoot.

Mista Hoot em i swapela senia opisa bilong IPA na em i kisim ples bilong Ivan Pomaleu, husat i lusim IPA long las wik Fonde.

Gavman i luksave long gutpela lidasip, ekspirensa save bilong Mista Pomaleu, na makim em i kamap nupela Ambaseda bilong PNG i go long APEC.

Mista Pomaleu, husat i bin wok 20 yia long IPA, i risain na lusim wok long las wik Fonde. Em i bin stat wok long Septemba 23, 1996 and em i risain long Septemba 23, 2016.

Em i bin wok 16 yia

olsem Menesing Dairekta bilong IPA na aninit long lidasip bilong em, IPA i bin lukim planti gutpela senis i kamap.

Mista Hoot i tok tenkyu long lidasip bilong Mista Pomaleu na em i tok em bai skruim wok i go moa long larim IPA i stap strong yet na kamap namba wan gavman ejensi bilong promotim tred na invesmen long kantri.

"Mi laik tok tenkyu long yu bin soim gutpela lidasip na gutpela rot long promotim bisnis na invesmen long PNG," Mista Hoot i tok.

Mista Pomaleu i tok tenkyu long olgeta wok manmeri bilong IPA, husat i bin helpim em long wok na stap wan-

taim em long gutpela taim na taim no gut wantaim.

"Mi laik tok tenkyu long gavman bipo na gavman nau long makim mi kamap menesing dairekta long tripela tem olgeta.

"Nau gavman i makim mi gen long kisim dispela nupela wok taim kantri i redi long holim bikpela bung bilong APEC long yia 2018.

"Mi laik tok tenkyu long famili bilong mi long givim sapot long wok bilong mi olgeta de. Mi laik tok tenkyu long Minista bilong Tred, Komes na Industri, Richard Maru, long bilip strong long mi, na long sapotim mi," Mista Pomaleu i tok.

Maru wanbel long wok bilong Pomaleu

MINISTA bilong Tred, Komes na Industri, Richard Maru, i salensim ol menesing dairekta na sif eksekutiv opisa (CEO) bilong ol kampani bilong gavman na arapela gavman ejensi long bihainim lidasip stail bilong pastaim Menesing Dairekta bilong Investment Promotion Authority (IPA), Ivan Pomaleu.



Menesing Dairekta bilong Investment Promotion Authority (IPA), Ivan Pomaleu.



MINISTA bilong Tred, Komes na Industri, Richard Maru

em i mekim taim em i bin stap Menesing Dairekta bilong IPA.

"Olgeta samting em i mekim i gutpela tasol. IPA i senis tru na mi laikim nupela menesing dairekta mekim moa wok long paim level bilong wok," Mista Maru i tok.

Mista Maru i tok makim maus bilong gavman na tok tenkyu long Mista Pomaleu i mekim gutpela wok na sevim gut gavman na pipel bilong dispela kantri long 20 yia.

"Bikos long hatwok bilong yu, planti ol nupela investa i wok long kam insait long kantri

bilong yumi. Ol i kisim mani i kam insait long kirapim bisnis na ikononi bilong dispela kantri," Mista Maru i tok.

"Planti gutpela samting em i mekim long kirapim dispela namba wan opis bilong kirapim na promotim bisnis long kantri bilong yumi," Mista Maru i tok.

Pastaim Bod Siaman bilong IPA, Valentine Kambori, i tok Ivan Pomaleu em i wanpela fit man long ranim gavman ejensi.

Mista Kambori, husat i bin pastaim Seketeri bilong Ne-

senel Plening na Dairekta bilong Kokonas Industri Koporesen (KIK) i tok em i save laikim wok bilong Mista Pomaleu bikos em bin lukim planti gutpela senis i kamap long IPA taim Mista Pomaleu i bin stap menesing dairekta.

"Pastaim mi bin stap dairekta bilong Kokonas Industri Koporesen (KIK) na wanpela taim wanpela yangpela man i bin kam mekim wanpela presentesen long wanpela woksop.

"Bihain mi bin putim ai long dispela yangpela man na bihain mi bin pianimaut olsem dispela yangpela man i bin kamap menesing dairekta bilong IPA.

"Mi wanbel tru olsem em i sevim gavman gut tru, na soim rot long arapela ol yangpela manmeri bilong dispela kantri long bihainim taim ol i laik sevim gavman, pipel na kantri," Mista Kambori i tok.

Siaman bilong IPA wanbel long wok Pomaleu i mekim

SIAMAN bilong Investment Promotion Authority (IPA), Leon Buskens, i tok tenkyu long pastaim Menesing Dairekta Ivan Pomaleu i bin mekim planti gutpela wok long standet bilong IPA i go antap moa.

Insait long 20 yia Mista Pomaleu i bin bosim IPA, Mista Buskens i tok IPA em i bin kamapim planti gutpela samting na soim we long narapela ol gavman ejensi na stet on entaprais long ranim ogenesisen.

Mista Buskens i tok ol dispela senis IPA i kamapim aninit long lidasip bilong Mista Pomaleu i mekim IPA i kamap wanpela fit na namba wan gavman ejensi long promotim tred, bisnis na invesmen insait long PNG.

"Planti gutpela senis i bin kamap long IPA aninit long lukluk bilong Mista Pomaleu na mi amamas tru.

Ol bod ov dairekta bilong IPA i wanbel stret long ol gutpela wok em i bin mekim insait long 20 yia em i bin stap wantaim IPA," Mista Buskens i tok.

Mista Buskens i tok tupela taim PNG Institute ov Human Resource i bin luksave long IPA olsem namba wan pablik sekta ogenesisen bikos ol operesen wok na arapela ol samting long IPA em i stap long standet stret.

Mista Buskens i tok sampela ol gutpela rifom o senis IPA i bin kamapim, em ol:

Kamapim nupela onlain rejistri long helpim ol bisnis manmeri na investa i go insait long websait bilong IPA na mekim ol samting olsem rejistaim kampani, kisim kampani ekstrat, peim mani long benk, na arapela ol wok long intanet;

Ap-detim odit ripot bilong IPA long larim gavman i luksave long wanem ol wok IPA i mekim na givim ripot long olsem wanem IPA i yusim mani;

Kamapim planti nupela global koneksen long larim planti nupela investa na bisnis manmeri long narapela kantri i kam insait long PNG na mekim bisnis; Kamapim gutpela sistem

bilong luksave long ol welfea na sosel sevis bilong ol wok manmeri bilong IPA long larim ol i stap gut na amamas wantaim mekim wok;

Kamapim ol nupela lo olsem Sekuritis Ekt, Kepital Makets Ekt, Derivativs Ekt na senisim sampela lo bilong Bisnis Nems na Kampanis Ekt;

Opim planti nupela maket bilong ol prodak bilong PNG long salim long ovasis;

Na kamapim planti nupela samting long larim standet bilong operesen bilong IPA i stap wankain olsem arapela ol wankain ogenesisen long ovasis.

"Ol bod memba bilong IPA i wanbel tru long ol dispela gutpela wok Mista Pomaleu i mekim.

Mi makim maus bilong ol memba bilong IPA bod na autim tok amamas bilong bod i go long meri, pikinini na famili bilong Mista Pomaleu," Mista Buskens i tok.

Minista Maru i bin wanbel stret long ol gutpela wok Mista Pomaleu i bin mekim long kamapim planti gutpela senis long IPA na apim level bilong dispela gavman ejensi.

IPA i stap aninit long Ministri bilong Tred, Komes na Industri. Mista Pomaleu i bin wok 16 yia olsem menesing dairekta na 4 yia olsem opisa bilong IPA.

"Mi save wanbel long wok bilong Mista Pomaleu. No gat wanpela no gut samting

PNG laik kisim dokta long Cuba

PRAIM Minista Peter O'Neill i tok gavman bai haiaim ol dokta bilong Cuba bikos PNG i sot long ol dokta long lukim na oraitim ol sik manmeri.

Mista O'Neill i tok em bai go long Cuba long mun Oktoba na

toktok wantaim ol Gavman opisa bilong Cuba.

"Kantri i sot long long dokta na gavman i lukluk long kisim ol dokta i kam insait long Cuba.

Mipela bai go long Cuba long Oktoba na

stretim ol toktok na pepa wok long larim sampela ol medikel dokta bilong Cuba i kam wok long kantri," Mista O'Neill i tok.

Cuba em i wanpela kantri long wol we medikel standet bilong dispela kantri em i antap tumas.

Planti ol nes na dokta bilong Cuba em ol speselis bilong wan wan bodi bilong man, na planti bilong ol i save go wok ausait.

Mista O'Neill i tok sampela bilong ol medikel dokta bilong Cuba bai kam wok long PNG.

SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the **Smart Business** current account provided transaction records that were used to support my **BSP Smart Business Loan** application to help me expand my Business."

Helen Victor
Owner of Zoenani Gas Ltd
BSP Smart Business customer

WE ARE **BSP**

☎ 320 1212 / 7030 1212 - 24/7 ✉ servicebsp@bsp.com.pg 🌐 www.bsp.com.pg 📱

PNGDF AME aprentis pinisim kos wantaim gutpela mak

PAPUA Niugini Difens Fos (PNGDF) Air Transport Wing i bin holim welkam pareid long Fraide las wik long mekim luksave long 8-pela defens fos aprentis bilong ol husat i bin pinisim wanpela kos long Aircraft Menetenens long Sydney Australia wantaim gutpela mak long skul bilong ol.

Ol 8-pela aprentis em; Kopul Rawali Kapi (Trening tim lida), Kopul Kuvang Francis, Lens Kopul Borezi T. Tomby, Praivet Siroro Obed, Praivet Vuvul Ezekiel, Praivet Mangun Joshua, Pravet Panga Jacob na Praivet Muchael Reynold i bin kisim wanpela skul bilong Ekraf mentenens na ensinia long wanpela sivel en-

sinia skul bilong TAFE, AVISKILLS long Tamworth, Australia inap long 18 mun olgeta.

Ol i bin kam bek gen long kantri long Mandé 19 Septemba 2016.

Long Fraide 23 Septemba Komanding Opisa (CO) bilong Ea Transport Wing Leptenen Kenel John Matagarakika, tok welkman na kongresulesens o tok amamas long ol bikos olgeta 8-pela soldia aprentis i bin pinisim klasrum skul bilong ol long dispela sivel skul wantaim mak antap tru long 90 pesen i go long 95 pesen.

Leftenen Kenel Matagarika i tok, "Dispela em i stat tasol bilong wok bilong yupela. Long Air Transport Wing na em i stat tude. Skul bilong

klasrum em i pinis tasol nau bai yupela i putim dispela save bilong klasrum i go long wok ples. Yupela i mas soim olsem yupela i soldia pastaim tru na bihain tingim wok olsem atisen."

"Dispela em i namba wan taim long mipela i salim bikpela grup bilong wanpela lain aprentis olsem na ol i mekim gut tru, winim sampela ol asples Australia yet long mak ol i kisim long ol eksam bilong ol," Lt Col. Matagarakika i tok.

Trening tim lida bilong grup, Kopul Rawali Kapi i tok skul i bin strongpela tru na ol i no bin gat taim long wokim ol narapela samting.

"Mipela i skul hat tru na no gat taim long raun nabaut tasol mipela i

mekim gut skul bilong mipela. Bai mipela stap long wok ples sampela moa mun na bihain bai ol instrakta i kam long Australia na asesim mipela, pastaim long mipela i kisim setifiket 4." Kopul Rawali i tok.

Em i tok olsem dispela em i namba wan taim gen long sampela lain soldia i kisim dispela kain trening, bihain long ol i stop long mekim kain trening long 22 ya olgeta, na dispela em long spona bilong PNG Difens Fos yet aninit long dispela gavman.

Bipo tru wantaim patnasip bilong Australia Difens Fos mipela i save mekim dispela kain trening tasol bilong wan wan opisa tasol, i no long bikpela grup olsem.



Ol soldia husat i kam bek long skul bilong Aircraft Menetenens long Australia. L-R: Lens Kopul Borezi T. Tomby, Lens Kopul Siroro Obed, Kopul Rawali Kapi (Tim Lida), Lens Kopul Vuvul Ezekiel, Lens Kopul Magun Joshua, Lens Kopul Panga Jacob, Kopul Kuvang Francis, Lens Kopul Michael Reynold. Ol i sanap long welkam pareid bilong ol long ATW Henga long Pot Mosbi. Foto: Nicky Bernard.

Ol Air Transport Trening seksen i salim ol aprentis i go bek gen long Air Mentenens seksen we ol bai kisim trening stret long wok ples we ol balus i stap long en. Long makim dispela kam bek bilong ol long Aircraft Ment-

nens seksen, ol i sainim wanpela pepa ol i kolim "Return of Service Obligation" (RoSO). Ol dispela aprentis bai kisim wanpela moa yia long trening bilong ol long wok ples na insait long 12-pela mun bai ol asesas bilong ol

long Australia i kam long sekim wok lainim bilong ol inap ol i pinisim olgeta mak. Sapos ol i soim olsem ol inapim olgeta save bilong dispela wok, bai ol i ken kisim setifiket 4 bilong AVISKILLS bihain long 12-pela mun.

Hillary Clinton winim Presidensel Dibeit

Frieda Sila Kana i raitim

Tunde dispela wik.

SENETA HILLARY Clinton, pastaim Seketeri bilong Yunaitet Stets bilong Amerika i winim presidensel dibet o toktok resis long kamap presiden wantaim birua bilong en, bikpela bisnis man long US, Donald Trump, long

Dispela namba wan tok resis we i bin kamap namel long tupela kenidet bilong US Presiden posisen i bin kamap long Hofstra Yunivesiti long Nu York we wanpela niusman, Lester Holt i bin kamap modereta o man bilong givim askim long tupela.

Bihain long toktok, CNN nius i bin wokim wanpela wok skelim bilong dispela toktok resis na ol pipel i ting olsem Clinton i winim dispela dibet long 62 pesen na Trump i kisim tasol 27%.

US embesi long Pot Mosbi i bin singautim ol nius ripota bilong ol media ejensi long lukim dispela toktok reisis bilong tupela kenidet long televisen insait long haus bilong namba tu Embeseda, Joel Maybury long Pot Mosbi.


Ripot long CNN na Embeseda bilong US long Pot Mosbi i bin tok olsem dispela dibet em i wanpela bikpela dibeit stret we moa pipel long USA na long wol i bin lukim.

Em i namba wan Presidensel dibet na bai gat wanpela moa long dispela kain na tu bai i gat narapela bilong tupela kenidet bilong Vais Presiden long 4 Oktoba.

Tasol dispela dibeit o tok resis i soim olsem Seneta Clinton i bin redim gut toktok bilong en, na Trump i no redi gut tumas, maski em i bin gat 4-pela mun long redi.

Olsem na meri ya, Hillary Clinton i winim tingting bilong planti Amerika sitisen moa.

USA bai holim ileksen bilong nupela Presiden long Novemba dispela yia.



Praivet Magun Joshua kisim promosen long kamap Lens Kopul. CO Matagarika (Iephan) wantaim trening opisa Waren Opisa P Patrick Alex i senisim mak bilong ol soldia. Foto: Nicky Bernard

Ol PNGDF AirCraft Mentenens tim kisim promosen

Frieda Sila Kana i raitim

LONG Fraide 23 Septemba, 2016 Papua Niugini Difens Fors Air Transport Wing i lukim sampela soldia bilong ol i kisim promosen long praivet i go long Lens Kopul na Leptenen i go long Kepten long taim ol i bin wokim pereid bilong tok welkam long ol 8-pela treni Mentenens aprentis bilong ol.

Namel long ol dispela lain em tripela pailot i kisim luksave long kamap olsem kepten, wanpela bilong ol em Leptenen Randall Hepota na Leptenen Benamin Waibadi. Em tupela pailot bilong he-

likopta na Leptenen Jeffrey Haiaku em i fiks wing pailot o pailot bilong kasa o bikpela ami balus. Tupela narapela soldia husat i kisim promosen em wanpela long mediks na narapela long katering o lain bilong kuk.

Long ol treni aprentis em Praivet Siroro Obed, Praivet Vuvul Ezekiel, Praivet Magun Joshua, Praivet Panga Jacob na Praivet Michael Reynold husat i kisim promosen long mak bilong Lens Koporal.

Long dispela taim tu Komanding Opisa bilong Air Transport Wing, Leptenen Kenel John Matagarakika i tok ol dispela pailot na

ol mekenik bai kisim ples bilong ol olupela lain husat i stap yet long sevis bikos i no gat man long kisim ples bilong ol longpela taim.

Wantaim ol dispela trening bilong wokman, Difens Fos i gat wanpela Kasa balus na tupela helikopta we Australia Difens Fos i haia long Hevilift tasol i gat wanbel long PNGDF inap long yusim tu.

Leftenen Kenel Matagarakika i tok tenkyu long ol mekenik husat i bin helpim long stretim gia bokis bilong kasa balus taim em i bin bagarap long Vanimo na i stap 8-pela wik olgeta long hap. Em i

bin namba wan taim long ol mekenik bilong ami i karim hap bilong balus ensin i go long wanpela ples balus ausait na fitim enjin na karim i kam bek.

Em i tok tenkyu tu long Seketeri bilong Difens Fos long putim mani long ol i baim hap fiul ensin long kisim i go long fil na stretim.

PNGDF i gat plen long kisim tupela moa balus i kam insait tasol hevi bilong mani na ol i no baim yet. Tasol CO bilong ATW i gat bikpela bilip olsem pastaim long dispela yia i pinis bai ol kisim tupela balus i kam long Nu Silan.



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavaisor bilong mipela long Fon:

325 2500 o email i kam long: lbents@wantokniuspepa.com

PNG Yut i go long Siapan INDEX



Solwara Maining Long Papua Niugini

WANPELA nupela tingting i kamap nau olsem aninit long solwara ol minerel i pulap tru na stap. Long Yurop ol i kamap wantaim dispela nupela tok 'Blu Ikonomi'.

Dispela em i wanpela tingting bilong rausim ol samting long solwara bilong mekim mani.

Papua Niugini yumi no nupela long maining. Yumi lukim planti pinis na yumi lukim tu planti hevi i kam wantaim dispela ol maining projek.

Wanpela kampani, Nautilus Minerals i wok long redi nau long kam mekim wok painimaut long solwara bilong yumi long Papua Niugini. Ol saintis i tokaut pinis olsem i gat planti minerel long bet bilong Bismark Solwara. Nautilus Minerals bai i mekim wok painimaut long lukim sapos ol masin bilong em inap sanap strong insait long Solwara na mekim wok maining.

Dispela em bai i namba wan taim tru kain projek olsem bai i kamap long wot na long Papua Niugini. Ples we dispela wok painimaut bai i kamap em long Solwara namel long Rabaul, na liklik ailan bilong em Duke of York na Watom na Weskos Niu Ailan. Ol i kolim dispela prosek Solwara 1.

Ol saintis i tok dispela wok bai i kamapim bikipela bagarap aninit long solwara taim maining i go het. Ol i tok long dispela hap planti laip i stap. Kainkain ol laip bilong solwara i pulap long hap ya maski ples ya i daun na i tudak.

Ol saveman bilong wok bilong kisim pis i tok dispela solwara we maining bai i kamap em i haiwe bilong ol pis olsem tuna. Em i haus tu bilong ol pis long putim kiau na ples we ol liklik bebi pis inap gro. Nau yet Papua Niugini i save mekim moa long foa milien kina long ol pis em i save salim long ovasis.

Na olsem wanem dispela prosek bilong wok painimaut i mas kamap long Papua Niugini?

Gavman bilong Papua Niugini i bin hariap tru long givim tok orait bilong mekim dispela wok na i no sekim ol lo bilong em yet. Nau yet gavman i luksave olsem i nogat wanpela lo i stap we inap givim stia long wok bilong maining aninit long solwara.

Gavman i no tingim tu hau dispela prosek bai i halivim ol pipol. Nau yet ol pipol long Niu Ailan i luksave dispela prosek i no olsem ol maining prosek long graun. Em bai i no inap nidim planti wokmanmeri. Ol liklik fama i luksave ol i no inap benefit bikos bai i nogat wokman i stap long graun na inap baim ol kaikai ol bai i salim long maket.

Nautilus Minerals bai i mekim wok painimaut bilong em insait long tu na hap yia tasol. i gat luksave nau olsem dispela prosek em i dia tumas. Bikipela moni i lus long mekim dispela wok na taim em i kam mekim wok painimaut long sotpela taim tasol na kamapim bagarap long Solwara na sindaun bilong ol pipol wanem taim bai em i gat long stretim ol hevi ya. Planti tru tru hevi bilong maining i save kamap sampela taim bihain long wok i kirap olsem na i gat pret long ol komyuniti olsem sindaun bilong ol bai i no kamap gut moa.

Insait long Bismark Solwara na Solomon solwara i gat moa long 50 tenemen we sapos dispela wok painimaut i go gut, maining i ken kamap insait long Papua Niugini yet. Ol arapela kantri long Pasifik olsem Tonga na Kuk Ailan i lukluk nau long wanem bekim bai i kam long dispela wok painimaut.

SIKSELA lain yangpela man na meri i bin lusim Papua Niugini long 24 Septemba long go long Siapan long stap insait long Intenesenel Yut Developmen Eksens (INDEX) Program bilong 2016.

Aninit long dispela program, Kabinet Opis bilong Siapan Gavman i bin askim long 6-pela yut bilong PNG long wok bilong gavman, akademik, jenelisem na spot long i go long dispela INDEX program bilong 2016.

Long taim bilong ol long Siapan stat long Septemba 26 i go inap long 11 Oktoba, ol bai lukluk raun long siti Tokyo, Shimane Prefecture na Kagawa Prefecture. Ol bai holim ol tok-tok wantaim yut bilong Siapan na ol narapela kantri husat i stap insait long dispela program, lukluk raun lon gol eben na lokal eria na long ol ples bilong promotim kalsa. Ol bai gat taim long stap wantaim ol famili long Kagawa Prefectur long kisim moa save long wei bilong ol Siapan i save stap.

Intenesenel Yut Developmen Eksens Program em i bin stat long 1994 long tingim marit bilong Kraun Prins bilong Siapan. As tingting bilong dispela Program em long strongim pasin Poroman na luksave namel long ol yangpela pipel bilong



(L-R) Jerome Sesega (sumatin -UPNG), Clare Kliawi -Tim Lida (Dipatmen bilong Foren Afes), Milton Kisapai (PNG Emetik Komisen), Vanessa Jikoley (Sumatin-UOG), Robin-Luke Suang (Dipatmen bilong PMNEC) na Eric Tamaan (Jenelist-NBC) i stap em yet.

Siapan na ol narapela kantri na long strongim ol baileterel rilesen.

Ol i ting olsem dispela program bai kamapim ol yut husat bai soim lidasip skil o save long ol kain kain fil o wok na long kamapim sosol developmen. Long dispela we, ol lain i stap long dispela program bai i mas autim save an ekspiens bilong ol we ol i kisim insait long dispela program, insait long ol

wanwan ogenaisesen na komyuniti bilong ol bihain long ol i go bek long aspelas kantri bilong ol.

Embesi bilong Siapan i blipl olsem ol yut bilong PNG husat i bin go insait long dispela program bai givim planti gutpela samting i go bek long kantri na komyuniti long strongim gutpela pasin namel long Siapan na Papua Niugini gavman.



Eric Tamaan, nius ripota bilong NBC i wanpela bilong ol yut husat i go long INDEX program.

Namba wan lokol skul BoM buk i kamap

Papa na Lealea. Ol i kamapim dispela buk wantaim helpim bilong lokal kampani, Esmie Sinapa Developmen Konsaltan na ExxonMobil PNG.

Maski ol opisa bilong Edukesen Dipatmen i no kamap, Sentral Provinsal Edministresen na Edukesen divisen i kamap na kisim dispela buk long Redscar Haiskul long Porebada Tunde dispela wik.

Long makim maus bilong bod ov menesmen bilong wan wan ol skul long foapela ples Redscar Haiskul BoM siaman i tok Oveai Maino i tok long laip edukesen i bikipela samting.

Na long ol atoriti husat i go pas long lukim edukesen i kamap gut, ol skul i mas ron gut.

Em i tok no gat gutpela gavman bilong skul bai lukim skul i no ron gut na ol sumatin i no kisim gutpela save na strongim sindaun bilong komyuniti long bihain taim.

Long taim bilong kisim buk Sentral deputi provinsal edministreta Edward Kila i tok amamas na tok tenkyu long ol foapela ples long kamapim dispela buk.

Em i tok ol skul bod ov menesmen bilong ol skul long



Murray Bell, ExxonMobil LNG plen menesa wantaim Sentral provinsal deputi edministreta Edward Kila i opim BoM buk. Foto: ExxonMobil midia.

dispela foapela ples bai yusim buk pastaim.

Sapos i wok gut edministresen bai yusim long provins na sapos i kamap gut ol bai kisim i go long Edukesen Dipatmen we Edukesen Minista bai askim Nesenel Eksekjutiv Kaunsil (NEC) long givim tok orait long Edukesen Dipatmen i yusim.

Dispela buk i gat 5-pela tok o modul em gutpela lidasip; gutpela komyunikesen; strongim save long Saiens, Teknoloji, Enjiniering na Metametik (STEM); gutpela gavanens na rot bilong yusim gut dispela buk.

Em i tok las taim Edukesen Dipatmen i bin gat BoM buk em long 1981 we sampela ausait manmeri i kamapim na ol i rivuim buk long 1995 gen.

Tasol dispela buk we ol i tokaut long Porebada i kamap bihainim tingting bilong lokal komyuniti.

Long skruim toktok bilong edministreta ExxonMobil PNG Komyuniti Developmen Sapot menesa Sisa Kini i tok kampani i givim luksave long kamap bilong BoM.

Em i tok stap bilong BoM i bikipela samting long gutpela ran na kamap bilong skul.

"Skul BoM i save strongim

visen na misin bilong skul na i save kamapim tingting bilong komyuniti long skul," Kini i tok.

"Gutpela lidasip i save luksave long ol salens bilong oganaisen bilong em na i save painim rot long edresim dispela ol salens.

"Long dispela as ExxonMobil i amamas long givim sapot taim em i harim tingting bilong kamapim ol gutpela rot bilong ol skul bod ov menesmen i ran."

Em i tok bikipela hap kampani i helpim em long sait bilong mani na ol arapela samting we komyuniti i laikim long taim bilong kamapim buk.

Bikpela namba bilong ol man na meri marit



Grup piksa long 58 arappela sios memba long wanpela de weding o marit seremoni long planti lain long wanpela taim i bin kamap long Mapemo long lufiyufa long Isten Hailans long las wik Sande wik. Foto: Sape Metta

Sape Metta i raitim

LAS Sande Septemba 25, 2016 emi wanpela spesel de bai go daun long histori bilong ol lidaman na meri na ol famili bilong ol, ol Seven De Edventis (SDA) sios kongriksen long Asaro/Watabung distrik, Goroka, Isten Hailans, Hailans Rigin na Papuan Niugini tu.

Long dispela de, 58 man na meri husat em ol memba bilong dispela sios

kongriksen i bin marit insait yet long Mapemo sios banis ausait tasol long Goroka.

Sios Famili Laip Kodineta, James Ghare husat i bin go pas long ogenaisim na stretim dispela planti lain i marit tok long las yia yet long taim em i bin kamapim dispela tingting, ol wan wan marit i bin wanbel, long wanem, ol i laikim olsem sapos ol i marit insait long sios, luk-save na pasin bilong

strongim marit tu bai stap. Distrik Dairekta, Pasto Elvis Bikukure husat i bin go pas long dispela bikpela marit grup i tok, em i nupela samting i kamap long distrik na provins tu.

“Mi amamas tru long lukim olsem ol man na meri husat i bin marit pinis long pasin kastom na tumbuna i kamap na strongim gen marit bilong ol insait long sios. Ol i mekim olsem na bai luksave na pasin bilong strongim

marit tu i ken stap strong insait long wan wan komyuniti long distrik”, Pasta Bikukure i tok.

Olpela presiden bilong SDA Isten Hailans/Simbu Misin, Pasto Jesley Ferugaso i bin go pas long givim sotpela blesing long lotu na bihain long opisel wok marit long 58 man na meri.

Seremoni i bin pinis wantaim saining na presentesen bilong ol marit setifiket.

Sound of Musik muvi ektres i dai

THE SOUND of Musik em i wanpela muvi piksa planti lain long wol na tu, long dispela kantri, moa yet, ol papamama i gro ap long ol yia long 1960, 70 na 80, i save long en na i laikim.

Tupela wik i go pinis, muvi ektres Charmian Carr i gat 73 krismas husat i bin ekt olsem namba wan pikinini meri bilong ol von Trapp pikinini meri long fevered muvi ol i bin kamapim long 1965, i dai.


Planti i laikim stret Charmian Carr husat i bin gat 21 krismas na i ekt olsem namba wan pikinini bilong von Trapp long muvi, The Sound of Musik, em produsa Rodgers & Hammerstein i kamapim.

Em i bin singim singsing, “Sixteen going on Seventeen.”

Miss Carr i bin sik na dai long Los Angeles, Amerika.

Em i bin raitim tupela buk long ol ekspiriens bilong em wantaim, The Sound of Musik.

Ol i kolim ol buk long “Forever



Charmian Carr

Liesl and Letters to Liesl.

Em i save promotim na stap long ol samting i karamapim The Sound of Musik, na tokim ol pipel long tingim muvi olsem wanpela terapi na muv, danis na singsing.

Em i bin kamap wanpela interia disaina long saut California na ol sampela biknem klaien bilong en em long Michael Jackson na skrin raita bilong The Sound of Musik, Ernest Lehman.

Em i lusim bihain tupela pikinini, 4-pela bubu na 6-pela narapela ekta we em i bin ekt wantaim long The Sound of Musik, husat i kamap olsem famili bilong em.



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg

MCCI helpim “Water Rats” daunim stil pasin

Ol tred opis bilong Fiji na PNG i stretim toktok

James G. Kila i raitim

STIL PASIN i long Madang taun i go daun nau bihain long Madang Semba ov Komes na Industri (MCCI) i bin baim wanpela moto bot na givim polis long patrol long solwara klostu long taun.

Presiden bilong MCCI, Kevin Murray i tokaut long dispela long Madang Investment Samit i bin kamap tupela wik i go pinis.

Mista Murray i tok planti stil pasin long taun save i lukim ol stilman i yusim dingi o motobot long kamapim ol stilpasin na ranawe yusim solwara. Planti long ol stil pasin long ol bisnis haus we i bin kamap long stat bilong dispela yia em taim ol stilman i stil na ronawe long motobot we i sambai i stap.

Mista Murray i tok dispela stilpasin we ol stilman yusim solwara long kamapim i stop bikos long kamap bilong wanpela solwara patrol yunit bilong Madang polis ol i kolim “Water Rats”.



Presiden Madang Semba ov Komes na Industri, Kevin Murray, i toktok long Madang Investment Samit.

Em i tok bihain long MCCI i givim dingi wantaim moto i go long Madang polis na ol i kamapim dispela nupela yunit em ol i kolim “Water Rats,” bikpela senis stret long stilpasin i kamap na hevi i go daun.

Mista Murray i tokaut olsem stil-pasin long Madang taun i bin bikpela hevi tru long pastaim na dispela i kamapim pret na nem nogut long provins. Ol investa tu i pret long wokim bisnis na pret tu i bin stap

long sait long turis i kam long provins.

Em i tok MCCI i bin luk-save olsem planti taim ol stilman i save yusim ol banana bot long kamapim hevi na ronawe long solwara. Na long pastaim tu polis long Madang i no bin gat bot na wanpela yunit long wok long solwara long stopim o banisim ol stilman long wokim trabel.

Murray i tokaut tu olsem wokabout patrol bilong ol nupela polisman tu i helpim

stret long daunim ol liklik stilpasin namel long taun.

Em i tok MCCI i bin helpim ol yangpela polis lain long baim ol nupela taia bilong ten sita kar bilong ol. Dispela i helpim ol long sait long transpot long mekim wok long daunim lo na oda hevi insait long Madang taun sentral bisnis distrik (CBD).

Murray i tokaut tu olsem MCCI i helpim long putim mani long stretim sel-blok long Jomba polis stesin.

OL tred opis bilong Fiji i kam insait pinis long kantri na ol i wok long stretim toktok long larim tred namel long PNG na Fiji i ran gut.

Minista bilong Tred, Komes na Industri, Richard Maru, i tok ol opis bilong Minstri ov Industri, Tred na Turisim bilong Fiji, Biosekuriti Opis bilong Fiji, i kam insait long kantri long las wik na i wok long toktok wantaim ol opisal bilong PNG.

Delegesen bilong Fiji i bin gat Tred Komisina bilong Fiji i kam long PNG, Navitalai Tuivuniwai, Sif Veterinarian, Dokta Sian Watson, Sif Plent Proteksen Opisa, Nilesh Ami Chand na Ronal Prasad, husat i tim lida bilong Tred Fesilitesen na Komplaiens.

Teknikel tim bilong PNG bin lukim ol tim memba i kam long NAQIA, Dipatmen ov Tred, Komes na Industri, Dipatemen ov Egrikalsa na Laivstok, wan wan ol mausman bilong kampani husat i save wokim Ox & Palm Mit, Snax Bisket and Trukai Rais, na arapela ol gavman opis.

Minista Maru i wanbel long ol opisal bilong Fiji i kam long PNG long toktok wantaim ol opisal bilong PNG.

“Mi lukluk go het long wokbung wantaim ol na mi laik tokim Gavman bilong Fiji olsem PNG bai wokbung wantaim ol opis long stretim dispela hevi, na harim tred i

kamap gut namel long tupela kantri bilong yumi,” Mista Maru i tok.

Em i tok dispela tim i kam long Fiji i mas yusim dispela sans long toktok na stretim ol arapela samting bilong tred namel long tupela kantri.

Long Mande long dispela wik tupela grup bilong opisal i bin gat wanpela miting na bihain long en ol i bin go lukluk raun long faktori bilong Hugo Canning Company, Paradise Foods Limited na Trukai Industries Limited.

Dispela raun na we ol opisal i lukim na skelim ol dispela tripela faktori bai helpim ol opisal long kari-maut ol teknikel asesmen bilong Ox & Palm Mit long Hugo Canning, Snax Bisket long Paradise Foods Limited na Trukai Rais at Trukai Industries Limited long Lae.

Fiji Minista bilong Industri, Tred na Turisim, Faiyaz Siddiq Koya, i tok em i bilip strong olsem tupela tim bilong Fiji na PNG bai stretim ol toktok long gutpela wei.

“Mi wanbel long tupela tim bilong Fiji na PNG bai wokbung na stretim toktok long Pot Mosbi. Fiji i laik wokbung wantaim PNG na stretim dispela hevi bilong tred hariap long gutpela wei na strongim tred na iekonomik poroman wantaim PNG,” Mista Koya i tok.

DLIR amamas long Basamuk stua eria

James G. Kila i raitim

OL INSPEKTA bilong Dipatmen ov Leba na Industrial Rilesens (DLIR) i tok ol i amamas long lukim olsem Ramu NiCo Menesmen (MCC) i wok long givim moa taim long lukautim sefti long stoaeria bilong en long Basamuk Rifaineri long Madang provins.

Tripela inspekta bilong DLIR i bin mekim wok sekim i go long Basamuk Rifaineri long las wik Trinde. Ol inspekta ya em Vincent Peter, Fiona Vaso na Joselitho Yauma.

Bikpela as tingting bilong dispela lukluk raun long Basamuk Rifaineri em long sekim ol eria we Ramu NiCo i save putim ol samting we i ken kamapim paia olsem ol eksplosiv na tu, ol hevi disel fiul na wanem rot long transpotim ol dispela kemikol.

Ol tripela DLIR i lukluk raun i go long eksplosiv stua eria, ol i sekim ol spesel transpot we i save karim ol eksplosiv na tu, ol i go lukim



Tripela DLIR inspekta i sanap wantaim Basamuk Rifaineri menesmen long poto.

Basamuk Rifaineri hevi fuel stua eria na liklik fiul stesin.

Em i namba wan taim bilong ol lain DLIR inspekta long go sekim wok long Basamuk na ol i tok olsem ol i amamas long planti taim ol i lukim, na ol i amamas olsem kampani i wok long harim tok bilong atoriti long stretim ol sefti eria long wok bilong en. Maski olsem i gat sampela liklik nid i stap long stretim sefti, kampani i wok long harim tok na bihainim na dispela em gutpela.

Mausman bilong ol DLIR

inspekta, Mista Peter i tok ol i amamas na wanbel long eksplosiv sefti menesmen plen bilong Ramu NiCo olsem megesin eria bilong em i stap longwe na ol gad fens instalesen sistem.

Ol lain DLIR inspekta i bin go long Basamuk long Tunde long wokbot bilong Ramu NiCo nem bilong en MV Carrie.

Na long Trinde ol i mekim wok lukluk raun long ol eria long Basamuk rifaineri na bihain go antap long Dugur maunten long lukim eksplosiv stua eria. Ol bin wok-

about raun wan taim Kopenet Helt, Sefti na Envairomen deputi jeneral menesa, Steve Liwei na deputi Basamuk Rifaineri jeneral menesa, Jason Jia.

Vais Presiden bilong Ramu NiCo long Basamuk Rifaineri, Hu Zhi Liang i tok tenkyu long sotpela ripot ol lain inspekta bilong DLIR i givim ol na i tokaut olsem kampani i welkam long wanem sefti toksave gavman i laik em mas mekim long stretim na ronim wok bilong en. Basamuk Rifaineri deputi



Banis bilong welhet...Poto i soim banis bilong Welhet B long Petroleum Developmen Laisens (PDL) 2 long Angore ges fil. Welhet em i hap we ol i save rausim o kamautim oil o ges i kam aut long graun. Angore PDL 8 i gat tripela welhet – Welhet A1, A na B. Poto i soim PNG LNG Projek opereta Exxon-Mobil i banisim Welhet B na pasim ges. Ol i no rausim yet ges bilong Angore. Poto: Aja Potabe

BSP Benk helpim Mingende Rural Helt Senta

MINGENDE Rurel Helt Senta long Kundiawa, Simbu Provins i kisim helpim long Benk Saut Pasifik komyuniti projek wantaim nupela wara tenk na 20 matres bilong wod bilong ol pikinini.

BSP Kundiawa i bin givim dispela projek na ol donesen i go long ol wokman na wokmeri bilong Helt Senta long las wik insait long wanpela seremoni.

Ol tim bilong BSP i bin mekim wok bilong putim wara tenk insait long wanpela mun. Ol wokman na wokmeri bilong helt senta, i givim han long kliaim hap bilong putim simen bilong sanapim tenk. Ol BSP brens wokman na wokmeri tu i bin wok wantaim ol long klinim ples, karim wara tenk na putim ol fitting na penim tenk na hap bilong putim tenk.

“Mipela i save olsem wantaim dispela komyuniti sevis projek, mipela bai lusim wanpela samting we bai kamapim gutpela senis insait long komyuniti. Mipela amamas long givim samting i go bek long komyuniti wantaim dispela projek,” Brens Menesa bilong BSP

long Kundiawa, Rita Singut, i tok.

“Em bai helpim bikpela lain pipel long rurel komyuniti long Simbu husat i save kisim marasin long dispela Helt Senta. Wantaim ol matres, mipela i laik helpim ol sik pikinini long slip na malolo gut long taim ol i stap long helt senta na nupela wara tenk bai holim inap wara long ol i ken yusim long klinik na long taim i no gat wara bilong haus sik i yusim long ol sik pikinini,” Helt Senta Seketeri, Mary Koai i tok.

Em i tok klia moa olsem wod bilong ol pikinini long Mingenede Helt Senta ol i bin wokim long 2014, na ol i save lukim siklain olgeta de na kisim ol long slip long haus sik tu. Em i wanpela namba wan helt senta long provins we i save givim gutpela sevis long ol komyuniti.

Mis Koai i tok, “Helt Senta em i wanpela helt senta we i save salim ol sikman na meri i gat bikpela sik i go long Kundiawa Jeneral Haus sik, na mipela tok tenkyu long BSP i luksave na helpim mipela.”



Rita Singut, BSP Brens Menesa, Kundiawa, (namba tu long lephan) na Elizabeth Koai, Helt Seketeri Mingende na ol wokman na wokmeri bilong Helt Senta i stap long kisim ol donesen long BSP Brens Menesa.

YWAM Medikol Sip kamap namba wantaim long Is Sepik

YWAM Trening na Medikol Sip MV Pacific Link volantia i amamas na kirap nogut long lukim ol kanu bilong ol Tarawa, solwara balus na ol tumbuna singsing i pulim ol i go insait long basis bilong Wewak, Is Sepik Provins las wik.

Namba wan ges ov ona long dispela taim em Gren Sif Sir Michael Somare, Gavana bilong Is Sepik husat i bin singautim YWAM Medikol Sip long bringim heltke na trening sevis i go long provins bilong em long las yia.

“Long sistem bilong gavman, helt na edukesen em i namba wan sevis. Helpim bilong YWAM i helpim yumi planti long helt bilong ol meri na pikinini i stap longwe long ol haus sik insait long ol ailan na bus we i no gat gutpela rot i kam long Wewak.

“Sevis i go long ol pipel em i bikpela samting na mi bilip olsem ol pipel bilong Is sepik bai

amamas tru long dispela,” Gren Sif, Sir Michael i tok.

MV Pacific Link Menesing Direkta, Brett Curtis, i tok welkam long Is Sepik Provins em i spesel samting stret.

“Mipela i amamas long wok wantaim Is Sepik Provinsal Gavman long go long ol hatpela ples long provins.

“Bikpela laik bilong mipela long wok wantaim ol narapela NGO, gavman na ol ki stekholda long Is Sepik Provins,” said Mr Curtis.

Sampela gavman opisa, sios lida, bisnis lida na ol lokal helt wokman na meri na ol NGO i bin go antap long sip pinis insait long las wik.

Ol wok bilong MV Pacific Link heltke sevis bai stat long Is Sepik long Oktoba 3 na bai i gat dentis wok, praimerihelt ke, optometri (ai) helt promosen na sapot i kam long ol lokal helt wokman meri .

Ol sapota bilong MV Pacific Link wok long Papua Niugini em Is Sepik Provinsal Gavman, PNG Ports Kopresen, Fred Hollows Faundesen, Swire Shipping, Consort Shipping na Sepik Kostal Ejen.

Nu Ireland bai go long ai operesen

Ahimsa Kibikibi i raitim

FRED Hollows Foundation, wanpela Non Gavman Ogenaisesen bilong stretim ai helt, na Jeneral Haus sik long Kavieng i tok moa long 200 biklain manmeri i putim nem long sekim ai o kisim operesen long stretim ai bilong ol.

Fred Hollows Foundation i gat wokbung wantaim Nu Ailan Provinsel Gavman na

wok bilong ol insait long Niu Ailan Provins i bin stat long 2014.

Long 2014, ol i bin mekim, 154 ai operesen na long 2015, ol i bin wokim 203 ai operesen. Long stat bilong dispela yia taim tim i kisim nem, 103 i bin rejista na nau moa long 200 nem i stap long kisim helpim na bringim namba i go antap long 217. tasol ol i ting dispela bai go antap yet.

Program i ran aninit

long bikpela het tok- tok olsem “Daunim Ai Pas insait long Nu Ailan”. Tim bilong Fred Hollows na ol ai dokta insait long Jeneral Hausik long Kavieng i rejista, sekim ai long painim aut sapos sik marasin i ken stretim o sapos i bikpela tumas ol i redim ol long ai operesen.

I gat planti gutpela stori i save kamap behainim dispela ol ai operesen bikos planti long namba wan taim

ol i ken lukim famli bilong ol na bikpela amamas i save kamap.


Long wok painim bilong Fred Hollows bikpela namba tru , kain olsem 70 pesen long ai pas insait long PNG em Cataract. Dispela em wanpela medikal kondisen we glas bilong ai i save smuk na i mekim ai i pas o i hat long lukluk gut.

Tim bai stap long Kavieng inap long namba wan de bilong Octoba.



MV Pasifik Link i go insait long Wewak basis wantaim selebresen las wik. Foto: YWAM Sip midia.

Misin mun na Misin Sande 2016



OLGETA yia long mun Oktoba yumi joinim Pop na olgeta Katolik long wol long selebretim mun bilong Misin. Long dispela mun yumi laik tingim wok misin bilong Sios na misin bilong yumi. Yumi yet i Sios. Olsem na taim yumi kisim baptismo, yumi i kamap memba bilong Sios, yumi i kamap misioneri bilong Sios long skel bilong yumi yet.

Long dispela yia, Yia bilong Marimari, yumi laik tingim pasin marimari bilong yumi.

Olsem na, "Marimari em i misin bilong yumi", em i astingting bilong dispela Misin Mun na Misin Sande.

Sios em i gat wok misin. Yumi olgeta i gat wok misin. Wok misin em i no wok bilong bihainim wanpela we bilong lotu o bihainim

wanpela program. Nogat. Misin em i bun tru bilong bilip yumi. Husat i save bihainim Krai i mas i stap misineri, bikos Jisas i salim disaipel bilong em i GO, na kamp witnes bilong Em, witnes bilong laik pasin na marimari..

"On this World Mission Sunday, all of us are invited to "go out" as missionary disciples, each generously offering their talents, creativity, wisdom and experience in order to bring the message of God's tenderness and compassion to the entire human family. By virtue of the missionary mandate, the Church cares for those who do not know the Gospel, because she wants everyone to be saved and to experience the Lord's love. She "is commissioned to announce the mercy of God, the beating heart of the Gospel" (Misericordiae Vultus,12) and to proclaim mercy in every corner of the world, reaching every person, young or old" Pope Francis

Yumi ken mekim dispela wok misin long kain kain rot:

Yumi ken autim Gutnius long pasin bilong yumi. Yumi ken soim gut Kristen pasin, olsem pasin bilong marimari na laik pasin long narapela na bai narapela i lukim na ol tu bai bihainim. Bai yu mekim ol i lain bilong Jisas tu.

Yumi i ken beten long ol lain i go pas long autim Gutnius: ol rilijes na

kain kain misineri.

Yumi ken sapotim wok misin bilong Sios long liklik ofa bilong mipela (ofa i mas i go w a n - taim pre na sakrifais).

Yumi ken joinim wanpela misin klap long peris na wok long pre na supotim misineri bilong PNG i autim Gutnius long narapela kantri (Zambia, South Sudan, Togo, Ghana, Argentina, Bolivia...)

I gat sampela ogenaisesen bilong Sios ol i kolim "Pontifical Mission Societies", i save helpim yumi long save moa long wok misin bilong Sios. I gat 3pela sosaiti i save sapotim wok misin. Wan wan i gat spesel wok bilong em.

1. The Society of the Propagation of the Faith (Sosaiti bilong autim Gutnius)
2. The Society of St. Peter the Apostle (Sosaiti bilong Aposel Pita) - Em i helpim skulim nupela pris
3. The Holy Childhood Association (Sosaiti bilong Santu Pikinini) - Em i helpim ol pikinini.

F a u n d a b i l o n g S o s a i t i b i l o n g A u t i m G u t n i u s, e m i w a n p e l a y a n g p e l a



meri bilong kantri Frans - Pauline Jaricot, (1799 – 1862)

Em i bungim sampela lain manmeri ol i laik helpim wok misin. Olsem na ol i pre na ol i bungim sampela likilik toea na salim i go long helpim wok misin olsem na namba wan wok bilong "Propagation of the Faith" em bilong kirapim tingting long wok misin na bilong luksave long nid bilong ol nupela daiosis bilong wol.

Em i askim tu ol pipel long pre long helpim ol misineri na ol pipel ol i wok long helpim. Dispela sosaiti i save askim ol bilipmanmeri long sapotim wok misin long mani.



Founda bilong Sosaiti bilong St. Pita, Aposel, em i narapela meri bilong kantri Frans - Jeanne Bigard (1859 – 1934)

Jeanne i harim sampela misineri i kraik long helpim long skulim nupela pater olsem na em tu i stat long pre na wok long bungim sampela mani long helpim skulim nupela pris.

Olsem na dispela Sosaiti i save sapotim ol semineri na ol rilijes long ol misin daiosis. Ol i askim ol pipel long pre long vokesen na sapotim ol.

Founda bilong Sosaiti bilong



Santu Pikinini, em i wanpela bilong kantri Frans - Bisop Charles de Forbin Jansen. (1785 –184)

Em harim long pren bilong em planti pikinini i nidim help olsem na em i bungim Pauline Jaricot na tupela toktok long wei bilong helpim ol pikinini. Pauline i tokim ol, askim pikinini bilong Frans long helpim pikinini bilong narapela kantri. Ol i tu ken pre na bungim liklik "soue" - toea na salim i go helpim narapela pikinini.

Olsem na dispela Sosaiti i joinim olgeta pikinini bilong wol long prea. Olgeta pikinini i save stap long skul ol i ken i stap misineri – lainim samting bilong misin na long ol arapela pikinini bilong wol, pre long helpim narapela, serim samting bilong ol wantaim ol pikinini bilong ol misin daiosis.

Ol dispela pikinini i kamap memba bilong "Missionary Childhood" bilong olgeta hap bilong graun. Ol i mekim tu bikpela misen wok. Ol i kamap misineri.

Wok wantaim long kisim Gutnius i go aut

Veronica Hatutasi i raitim

TAIM luksave na tok tenkyu i bin go long ol misineri husat i bin kisim Gutnius na ol sevis i kam long PNG na Solomon Ailan, na long sanapim ol daiosis long tupela kantri, tok tenyu tu i bin go long ol asples lei pipel o sios woka long sapot na helpim skruim wok evanjelaisesen i go aut long ol pipel na komyuniti.

Nupela Nunsio o mausman bilong sios long PNG na Solomon Ailan, Asbisop Kurian Mathew Vayalunkal i bin wokim m ol dispela toktok insait long misa i bin kamap long Mary Help ov Christians haus lotu long DBTI, Is Boroko long Pot Mosbi las wik Sande.

Samting olsem 6-pela bisop, 9-pela

pater na tripela asbisop i bin helpim Nunsio long wokim lotu bilong selebretim 50 krismas bihain long kirapim ol daiosis insait long PNG na Solomon Ailan.

Haus lotu i bin pulap long ol rilijes na ol Katolik sios memba insait long Mosbi siti na tu, ol India Katolik komyuniti long Mosbi husat i bin kam lotu long welkamim nupela Nunsio bikos em i bilong India.

Long wankain taim tu, lotu long dispela de i bin luksave long Mada Teresa bilong Kalkata i bin kamap Santu bihain long Katolik Sios long wol i bin givim luksave insait long bikpela seremoni long Vatiken long Rom, tupela wik i go pinis.

Asbisop Vayalunkal i bin autim tok amamas long kam wok long

PNG na tok dispela em i wanpela naispela kantri i gat gutpela klaimet olsem kantri bilong em India, ol diwai na bus, ol naispela pisin olsem Bird ov Paradais na ol samting moa olsem.

Em i bin tok pastaim em i kam long PNG, em i bin toktok wantaim Pop Francis na askim na kisim spesel blesing bilong Pop i kam long ol pipel bilong PNG na Solomon Ailan.

"Mi kam olsem misineri na pasto long sios na wasman long mekim laik pasin i kamap strong long lewa bilong mi," Nunsio i bin tok.

Ol sumatin bilong Don Bosco na Caritas i bin putim ol naispela tumbuna bilas na kisim ol presen i go long nupela Nunsio long taim bilong ofatori.



Nunsio Asbisop Kurian Mathew Vayalunkal wantaim ol Misineri Sisters ov Charity kongrigesen bilong Santu Mada Teresa bilong Kalkata long PNG bihain long lotu. Foto: Pater Ambrose Pereira sdb



Asbisop Karl Hesse em olpela sios lida long Rabaul Asdaiosis long Is Nu Briten husat i ritai na stap long asples kantri bilong em, Jemeni. Em i bin stap tu long selebresen, i bung wantaim sampela Katolik manmeri bilong Rabaul i wok na stap long Pot Mosbi, tasol ol i kam long selebresen. Foto: Veronica Hatutasi

WANTOK
KOMENTRI

Strongim ol pablik sevan long bringim sevis long ol pipel


OL provinsal edministreta i kisim strongpela tok lukaut i kam long Sif Seketeri Isaac Lupari long dispela wik. Mista Lupari i tokim ol long kirapim wok long wan wan provins. Em i tok ol edministreta i go pas long wok bilong ol pablik sevan long provins na ol i mas lukim olsem ol pablik sevan i mekim wok bilong bringim sevis i go long ol pipel.

Em i tok olgeta yia gavman i save givim bikpela mani tru i go long ol provins na distrik na long ol lokal level gavman. Em i tok wok bilong ol edministreta em long lukim olsem dispela mani i bringim sevis bilong lukautim ol pipel.

Dispela toktok bilong Sif Seketeri i no abrus. Bikpela mani bilong kantri i save go stret long wan wan provins na ol distrik na i go daun tru long ol lokal level gavman. Insait long wanpela yia, K10 milien i save go long wan wan distrik na long faivpela yia mak bilong mani bai winim K50 milien. Em i bikpela mani tru.

Tasol planti distrik na ol lokal gavman eria i no lukim bikpela senis. I tru i gat planti ol hevi i stap aninit na i save stopim ol pablik sevan long mekim gut wok bilong ol. Planti ples i no gat haus bilong ol o i no gat skul o haus sik i stap klostu we ol pablik sevan i ken sindaun gut na wok.

Dispela hevi i no bilong ol pablik sevan long ol provins tasol, nogat. Ol pablik sevan long Waigani tu i mas luksave long bikpela wok bilong bringim sevis i go long ol ples



Jada 0161

i stap longwe long taun. Ol i mas mekim wok bilong helpim ol lain long provins na skruim ol sevis i go long olgeta kona bilong kantri.

Dispela program bilong bringim sevis i go long ol pipel em i astingting bilong gavman.

Ol gavman bilong bipo i save

painim taim tru bikos i no bin gat gutpela program na mani bilong baset long mekim wok bilong bringim sevis. Tasol bihain long ol senis i kamap na gavman i skelim mani bilong wan wan distrik na LLG, rot i op long lukim ol sevis i go insait long kantri.

Long sampela provins, i gat planti politiks tumas olsem na wok i no save ran gut. I gat ol gutpela provinsal edministreta husat i laik mekim wok tasol ol politisen i save senisim plen bilong ol. Dispela kain pasin i save pasim rot bilong ol gutpela wok i kamap long provins na ol distrik.

Sampela provins i save lukim mak bilong mani i go antap long wan wan yia, tasol i no gat planti wok i kamap long soim olsem ol i yusim mani long bringim sevis i go long ol pipel. Na long sampela provins, mani i go tasol i sindaun nating bikos i no gat ol gutpela save lain long was long mani bilong bringim ol sevis.

Ol dispela toktok bilong Sif Seketeri i mas salensim ol pablik sevan long opim ai na kirapim wok. Long sampela provins ol pablik sevan i no gat sans long go bek skul na kisim nupela save long mekim wok bilong ol.

Ol i bin stap longwe na i no save long ol senis na ol nupela wei bilong mekim wok bilong gavman. Olsem na i gutpela tu long edministreta i mas luksave long dispela na givim sans long ol i go bek kisim ol sotpela trening long strongim wok bilong ol.

Wanpela gutpela rot bilong lainim samting em long harim na lukim eksperiens bilong ol wanwok long ol arapela provins o distrik na dispela i ken helpim ol long mekim gut wok.

Mobeta gavman i sevim mani ol dipatmen i save spendim long wokim ol woksop o semina long ol hotel long ol siti na taun na yusim dispela mani long givim moa sotpela trening long strongim save bilong ol pablik sevan long ol provins.

Yumi mekim olsem bai ol pablik sevan tu i amamas na mekim gut wok bilong ol long bringim sevis i go long ol pipel.

Gutpela tingting bilong Mental Feng Shui long stap gut

LONG stap gut hia nau em sampela gutpela tingting i kam long Mental Feng Shui bilong Saina.

Long amamas givim moa samting long ol arapela na givim wantaim bel isi na amamas.

Maritim man o meri yu save laikim long toktok wantaim bikos gutpela komyunikesen bai helpim yu taim yu go bikpela na lapun.

No ken bilip long olgeta samting yu harim, yusim olgeta samting yu gat na slip olgeta taim.

Taim yu tok, 'mi laikim yu', minim long lewa bilong yu stret.

Taim yu tok, 'Yu sori', lukluk long ai bilong narapela stret na tok.

Taim yu laik marit, poroman gut wantaim narapela 6-pela mun bipo long yu marit.

Bilip long laik pasin long



namba wan taim yu lukim narapela.

No ken lap long driman bilong narapela. Ol man na meri husat i no gat driman i no save gat samting.

Laikim narapela moa na laikim em gut. Sampela taim yu bai kisim pen tasol dispela em laip.

Long taim bilong hevi, toktok gut tasol no ken kolim nem na bagarapim narapela.

No ken skelim narapela long famili o we em i kam long en. Wan wan man na meri i narapela.

Taim yu toktok, toktok isi na gutpela tasol tingting hariap bipo long yu tok.

Taim wanpela i askim yu long wanpela samting yu no laik long bekim, smail na askim em gen, 'Bilong wanem yu laik save.'

Save olsem long gat bikpela laik na winim bikpela samting, dispela sampela taim i save kam wantaim hevi.

Tok 'bles yu' taim yu harim wanpela i kus (sneeze).

Taim yu lus no ken lus tingting long samting yu lainim.

Olgeta taim tingim tripela R: Rispektim yu yet, rispektim ol arapela na redi long bungim hevi taim samting i go bagarap.

No ken larim liklik hevi i bagarapim gutpela poroman yu gat long em.

Taim yu luksave yu mekim

asua, hariap long painim rot long stretim.

Smail o pilim gut taim yu laik ansa long telepon. Man o meri husat i ring inap save long yu.

Gutpela long stap wantaim ol arapela tasol sampela taim stap bilong yu yet na stap isi.

Amamas i save kamap long planti samting tasol planti bilong dispela i kam long kain tingting wanpela i gat long em.

Gutpela long wok long mani tasol sampela taim larim mani wok long yu.

Man na meri i no save klostu ol inap winim samting taim ol i givap

No ken tingting long tumora bikos em i save kam hariap.

Stap isi save winim hatpela samting.

Luksave na amamas long laip, nogut yu lus nating.

WANTOK

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



AMAMASIM INDEPENDENS WANTAIM KALSA

Nicky Bernard i raitim

INDEPENDEN i wanpela taim long olgeta yia Papua Niugini we ol manmeri na pikinini i save stopim olgeta wok bilong ol na sindaun isi na tingim dispela de ol lida bilong yumi bipo i bin wok hat long kisim kantri long han bilong ol Australia na yumi lukautim yumi yet.

Dispela de long Septemba 16, ol manmeri na pikinini i no save westim tu. Olgeta yia i kam na go ol i save amamasim dispela de long wanem hap na provins ol stap long en.

Long wik i go pinis, *Wantok Niuspepa* i bin raun na kisim sampela amamas long ol samting we ol lain long Mosbi bin mekim long amamasim dispela spesel de bilong PNG na putim long pepa long wik go pinis.

Dispela wik *Wantok Niuspepa* i luksave long sampela Papua Niugini meri husat i save wok hat long lukautim ol famili bilong ol na taim dispela bikpela de bilong PNG kamap, ol tu i no save slek, ol save wok na amamas wantaim.

Planti ol bikpela stoa long Mosbi i no save pas long Independens de bilong PNG. Ol i save wok long helpim ol pablik na tu helpim ol yet long kamap mani bilong bisnis bilong ol.

Stop N Shop em i wanpela bikpela stoa long PNG, na ol stap longpela taim nau long PNG. Taim PNG i save amamasim Independent de, ol tu save amamasim ol PNG wok manmeri.

Ol bos manmeri bilong Stop N Shop i save askim ol wok manmeri bilong ol long bilas long kalsa bilong provins ol i kam long en.

Long Independens de kala bilong olgeta stoa bilong ol i save senis long bilas bilong PNG i stret, na husat manmeri i bilas gut ol save winim prais.

Olgeta yia, Stop N Shop i save amamasim ol kastoma na ol wok manmeri bilong en. Ol kastoma save kisim Independent spesel long sampela kaikai long stoa na ol wok manmeri bilong ol i save kisim prais sapos ol bilas gut long kalsa long provins bilong ol.

Ol wok manmeri bi-


long Stop N Shop bilong narapela kantri i save tingim dispela de bilong PNG na werim ol PNG kala long soim sapot bilong ol long kantri bilong yumi.

Stop N Shop em i wanpela bikpela stoa insait long kantri we i save tingim ol de bilong yumi PNG na ol i save amamasim o sore wantaim Yumi.


Ol wokmanmeri i bilas long kalsa bilong ol long independens de na mekim wok bilong ol. Ol poto i soim stret pasin kalsa i kamap long Stop N Shop Pot Mosbi.
Poto: Nicky Bernard



Toro



Biabia



Kanage



Sen Peter Sanel Erima Peris raun long Yule Ailan long sentral provins

INDIPENDEN wiken i bin lukim wanpela Katolik perisina grup bilong Sen Peter Sanel Erima Peris long Pot Mosbi i i go long Yule Ailan long Sentrel provins. Ol i bin gat gutpela taim long lukim ples we ol namba wan Ka-

tolik Misineri i bin kam sua long en moa long 130 krismas i go pinis. Long planti yia, dispela ailan i bin gat ol gutpela sios hai skul bilong ol pikinini meri, haus sik nap les bilong lotu, tasol i no wankain

stori tude bikos long hevi bilong graun we sios i bin sindaun long en. Lukim piksa bilong sampela mama na ol pikinini i bin stap long wokabaut bilong grup.

Poto 01: Sampela ol mama i kisim motobot long Poukama nambis na go long Yul Ailan.

Poto 02: Sampela mama i kam sua long nambis bilong Yule Ailan wantaim ol kago bilong ol.



Mi ting olsem...

Autim Tingting

Teks i kam long 71845906

Yumi save tok Papua Niugini em i Kristen kantri. Long pasin bilong yumi, ol narapela kantri long wol tu ol i harim na ol i kam lukim na i laik stap long en.

Tasol i gat lo bilong dispela graun tu i stap, olsem na ol narapela kantri tu ol i pret long kam insait nating, i nogat tok orait pepa yumi save kolim paspot o visa.

Sapos trutru Papua Niugini em i kristen kantri, yumi i no ken tingim dispela paspot na visa na helpim narapela man long pretim pasin nogut bilong kantri bilongem na ranawe i kam long kantri bilong yumi Papua Niugini na i laik i stap wantaim yumi.

Olsem na nau mi lukim piksa na ritim stori bilong Mohamed Dahan bilong Africa nau i stap long han bilong lo.

Wanpela samting, ol man lukautim boda bilong yumi, ol i no mekim gut wok bilong ol long stopim na stretim long nupela taim yet.

Na nau em i stap tambu, brata, susa bilong yumi pinis na stap planti yia wantaim ol faipela pikinini, na meri bilong em na tu yumi kolim tambu long em pinis na ol pikinini tu ol i go bikipela pinis na nau yumi kirap na putim em long hevi, rong bilong husat long namba wan taim yet long em i kam insait long kantri bilong yumi.

Nau em i maritim pikinini meri bilong yumi na i gat ol pikinini na stap planti yia na em i pilim olsem em bilong Papua Niugini na i stap amamas wantaim famili bilong em.


Nau sapos kantri bilong yumi em i kristen kantri orait, larim em i stap wantaim yumi, na i no ken givim wari i go long famili na yumi olgeta yum.

Na tu bikipela lo i stap pinis na i banisim yumi olgeta antap long dispela graun olsem, yu laikim yu yet, olsem na yu laikim narapela man tu. Yumi mas pretim Papa God long dispela lo bilong em, em i givim yumi.

tenkyu.

Kau Boi
Krx, Madang Provins

Em nau! Ol pikinini i ken painim rot i go long ples wantaim Wantok lain...



R S V G R N T E L R S E F N R P A T R
 K H P S I U I U E R D E T A G
PAINIM WOD PILAI
 F L M L N S I A D F E H G E N K R R

- Ol wod lista:**
- | | | |
|-----------------|----------------|-----------------|
| JERMAN | BAIMBAI | MANDE |
| NINIK | DASAN | MISINARI |
| TERITORI | KALENDA | OPTIN |
| INGLIS | PAIAWUT | PLAUA |
| TOILET | HUKIM | PARABEL |
| ASKIM | KUNDU | RANIM |
| FAIVKON | GOAN | SPATEN |

A T E E M Q D I A R W O L R P D K A P S N R W D K
 L O X N I I P O N O F T V I M R W I G N U A T D K
 W C E O H D M A N G R O A G I B W G E A V O A L P
 Z A S E D P L P B F L B D G F G H P C J I I R A X
 P N E D R E S T A A M I A N T Y L P T P R S E A I
 M R F C W U F E L I P E S T S U E O Z S G L R G O
 T O O R G F I T A V A I A D D E N J E V D I D H F
 G H I B P E H B O K R W N N P E K S H O M G E N W
 O O G J T N Q Q K O A M U T T S N E E I A N H D B
 D U E U O L Z M T N B K I T P N E R K O C X N Q T
 G P S G I C S I I A E I M L N L M S H S E T E D H
 L R E T L I R S M Y L I O N O I A D V M L H S F X
 S E L K E E L I I C N N P G O A N U A S E H O I T
 I J S N T R K N N A N H T M E E D I A S Y B Y I E
 A S D E E U K A R A P A I M T M E D K P R S E E H
 C S I T H S M R L E H P N A H N D T S U O C S F H
 E O O P M R X I R E Q A P R S E G Z Y S R A I S A
 I A J E E S N S U I N S A Y B H Q T O F A C E U S
 H R D J G Y D J L A R D H Y H P D E D O P F D G T
 F T E E F R E D J R F E A J G Y P I Q O S E N E R

STORI BILONG TUMBUNA

Mumuim pik long matmat



Long wanpela hap i gat wanpela tumbuna man i stap, nem bilong en Sinimai. Wanpela de em i go long bus bilong painim kiau, na em i go lukim arere long ston na em i lukim wanpela man i slip i stap.

Man ya em i go klostu na lukim ya nogat. Wanpela masalai man i dai i stap. Na dispela man i lukim em na i surik bek liklik. Na bihain em i tingting bek long stori tumbuna na em i kam klostu na karim dispela bodi i go na planim long wanpela gutpela ples.

Na em i planim sampela naispela plaua bilong tumbuna na em i kam bek long haus na em i slip. Long nait em i driman na i lukim dispela masalai i kam na i tokim dispela lapun man, na i spik, bodi bilong mi i stap long bus na yu bringim bodi bilong mi

long gutpela ples na planim mi.

Na tumora moning taim tru yu kirap na kisim banara bilong yu na i go long ples yu bin planim bodi bilong mi long en, na bai yu lukim wanpela bikpela pik man bai i stap long dispela hap. Na bai yu sutim em long wanpela spia tasol bai em i dai. Na yu no ken kisim i go mumuim long arapela ples.

Yu mumuim long hia na kolim dispela 'Nanuwo Golik.' Na as bilong dispela nem i olsem: Masalai Ples Matmat. Na bihain ol i kilim wel pik ol i save kisim i go long Nanuwok Golik tasol na ol i mumuim.

Na nau tu ol i mekim olsem. Olsem na mi tu mi bilong dispela ples. Em long Jimi Riva Tabibuga.

Gola Pagai, Tabibuga/Maun Hagen

Ansa bilong Wod Pilai isu 2193

C P M O D Y C H O Q N P N A I N M T S I V P Z O G
 I E S T H J P W E L E N U T E H J F E D P E R N M
 M P C H M E A N G V M M N F A O S C Q V R S E Q I
 H I O P Z T T V R M E A O D E P D A V G X T D R Q
 B O O N M C O E N M L N S U L N E N V K L O I X
 M H I D H D A D A P T A H K R A R O N I M B J L A
 V W N C U A T O P A S B O A P S R A S Q P E S S N
 J C E D E I E N S K R U L S U T B O I I N S I H T
 P C F D B T T U O O N S I A S A U T I M I L Q S R
 L I P O A U H I I M K P M N K B D P A E O N S C Q
 O T Z T K S L X G F L E A G O M B A E O A H A P J
 L S A Q J E K M P U O T N W L A A I S L G E A U T
 M H N M G W E E A O R W I L P E S N E O A L V I M
 D A I N E U P M I K X E L S E S E K E E M R C I N
 O S A H O C M A P V A N I A L S R N S W I E M N K
 O V Q F S E Z V E I A U M E A I O I F R T H A N G
 E D W S W R Z A L P T R W P M O G G E F I T I E E
 G B A P O Z L Z A P F D G L A C Q G E B K N S N F
 N Z E T X K S J O N E S N T G M R H T N M Q G Q T
 Z P T I R R R H O N M M N O E E I B I F T H E S A



Bom pairap long Hungary

Ol polis long Hungary i sekap long ples we bom i bin pairap long Budapes long Sarere.

TUPELA polis long Hungary i bin kisim bagarap long taim wanpela bom i pairap long las wik Sarre.

Bom i bin pairap long 10 klok nait klostu long wanpela haus arere long bikpela rot. Polis ripot i tok tupela polisman husat i bin patrol long dispela hap i bin kisim bagarap nai go long haus sik.

Ol i no klia yet wanem samting tru i bin pairap tasol pablik televisen ripot i tok ol sekyuriti kamera i soim wanpela man i lusim wanpela beg long dispela hap bipo long em i pairap.

Ol toktok i kam long plis i tok ol i wok long mekim wok painim nau long dispela birua. Ol lain i bin lukim dispela birua i kisim poto na salim long sosel media.

Piksa i soim ol nil i kapsait nabaut long rot. Ol polis bai tokaut long as bilong dispela bikpela pairap. Ol polis i wok long mekim moa wok nau long husat ol lain kamapim dispela birua. Sampela witnes i tok ol i harim bikpela pairap olsem gas i pairap, tasol ol lain husat i go sekap i tok i no gat paia i bin kamap. Ol i bilip sampela lain i bin wokim bom na putim long dispela hap we em i bin pairap.

Ol lain long arapela hap bilong dispela biksiti bilong Hungary i bin harim dispela bom i pairap. Dispela bom i bin bagarapim ol banis bilong wanpela haus i stap klostu na glas bilong ol kar tu i bin bruk nabaut.

Wanpela man Amerika i

tok, "I bin gat bikpela pairap, planti smok na windo long hotel we mi bin stap long en i bin bruk."

Bihain long dispela bom i pairap, ol polis i banisim ples na tokim ol pipel long lusim haus na bihain ol lain bilong forensik i go sekap long olgeta haus i stap long dispela eria na askim ol manmeri.

Bai i gat wanpela referendum long Hungary long Oktoba 2 long plen bilong Yuropian Yunion (EU) long wan wan kantri i mas kisim ol lain refuji husat i pulap nau long Yurop. Ol pabik i pret long sekyuriti bilong kantri na ol posta bilong gavman i soim olsem ol lain refuji i gat koneksen wantaim ol teroris.

Ol kantri sutim tok long Rasia long UN Sekyuriti Kaunsil

INSAIT long wanpela miting bilong Yunaitet Nesens (UN) Sekyuriti Kaunsil, ol kantri i wok long sutim tok strong tru long Rasia i brukim lo nai wok long kilim nating ol pipel long Is Alepo long Syria. Ol toktok bilong stopim ol balus bilong Syria ami na Rasia long tromoi bom long dispela hap i lus nating long taim ol ami bilong Syria i wok long tromoi bom na bagarapim tru dispela eria long Alepo.

Ol dispela toktok egensim Rasia i kamap bihain long ol strongpela bom i pundaun long hap we 275,000 pipel i save stap. Ol i tok ol balus bilong Rasia i wok long tromoi ol dispela bom.

Ol dispela strongpela bom bilong bagarapim ol samting bilong ol ami, i wok long bagarapim ol haus bilong ol pipel, bagarapim ples hait bilong ol pipel, bagarapim ol pipel na kilim planti handet ol manmeri. Mathew Rycroft, UK Embasada long UN i bin mekim dispela toktok long taim ol i bung long imejensi sekyuriti kaunsil miting na toktok long hevi bilong Syria long Sande.

"Ol dispela strongpela bom bilong kamapim bikpela bagarap tru i wok long pundaun long ples we ol sivilien pipel i stap. Olsem na Alepo i kisim bikpela bagrap gen, ol i bagrapim wara saplai em planti milien manmeri i save yusim na dispela i givim taim tru long ol pipel. Yumi olgeta i luksave olsem Rasia i bung wantaim Syria long kamapim ol dispela woa kraim," Rycroft i tok.

NGO grup, Save the Children i tok ol dokta long Alepo i tok long Sande olsem hap namba bilong ol pipel i kisim bagarap long ol dispela bom em ol pikinini.

Long miting bilong sekyuriti kaunsil, embasada bilong Frans, Francois Delattre, i wanbel olsem ol dispela pasin bilong dropim ol strongpela bom long ples we ol manmeri i stap, em i brukim lo.

"Yumi no ken lukluk tasol. Ol i mas kisim sampela kain mekimsave. Yumi no ken larim ol i go fri, i mas gat sampela panismen.

US Embasada, Samantha Power i tok long taim ol bom i pundaun long tripela

sentia long Alepo em ol volantia imejensi sevis, ol White Helmet i save yusim, i bin bagarapim ol ikwipmen bilong sevim laip bilong ol pipel. I no gat ikwipmen bilong rausim ol ston na pipia bilong painim ol pipel husat i stap insait long haus em ol bom i bin bagarapim.

Em i tok long taim Foren Minista bilong Rasia, Sergei Lavrov i wok long toktok long ol rot bilong stopim woa long Syria, ol balus bilong Rasia i wok long lodim ol strongpela bom long go tromoi long Alepo.

Long bekim ol dispela toktok, Mausman bilong Rasia, Vitaly Churkin i sutim tok long ol lain rebel long brukim dispela promis bilong stopim pait long Alepo. Em i tok ol birua i banisim ol ami bilong Presiden Assad bilong Syria na ol i wok long pait bek long hap bilong Is Alepo.

Spesel mausman bilong UN long Syria, Staffan de Mistura i tok long taim ol balus i stat long dropim bom gen, moa long 213 pipel i dai long Alepo provins na 139 i bin dai long Is Alepo.



Solomon na Vanuatu i toktok strong long Wes Papua long UN

Sam Seke i raitim

TUPELA praim minista bilong Solomon Ailan na Vanuatu i bin tokaut strong long isu bilong Wes Papua long Yunaitet Nesen Jenerel Asembli long New York.

Praim Minista Manasseh Sogavare i tok hevi bilong bagarapim humen rait na indipenden bilong ol pipel bilong Wes Papua we Indonesia i mekim i sem samting.

Praim Minista Charlot Salwai bliong Vanuatu i tokim



Praim Minista Sogavare i toktok long UN.

UN tu olsem, em i laikim UN long i no ken toktok nating, tasol em i mas mekim samting stret long ol samting i kamap long Wes Papua.

Praim Minista Sogavare i tok tu olsem sapos i gat kwesten long hevi bilong sovreniti long Wes Papua, ol i mas kisim i go long kot.

RAMSI i mekim gut wok long Solomon Ailan

Sam Seke i raitim

GAVMAN bilong Solomon Ailan i lukim olsem wok bilong dispela Rijnol Asistens Misin (RAMSI) long kantri i bin gutpela tru.

Spesel Seketeri bilong gavman i go long RAMSI, John Wasi i tok RAMSI i bin

karim aut olgeta wok em i bin go long mekim long Solomon Ailan. Dispela em long sait long kamapim gut sekyuriti, lo na jastis, sait long ol gavman sistem, gavman mani na ikononi - we i bin bagarap long taim bilong etnik o wanpisin hevi.

Mista Wasi i tok ol dispela i

kamap gut nau, na em i taim long Solomon Ailan i gohet em yet long ol dispela gutpela wok na belisi long kantri.

Olgeta wok bilong RAMSI long Solomon Ailan we i bin stat long Julai 2003 bai pinis long Jun 2017. Ailan i redi pinis long olgeta wok bihain long RAMSI i lusim kantri.

Vanuatu pipel i no nidim visa nau long go long Nu Kaledonia

Sam Seke i raitim

Ol pipel bilong Vanuatu nau i no nidim visa long raun i go long Frens teritori bilong Nu Kaledonia long sotpela taim.

Pablik Rilens Opisa long opis bilong Praim Minista long Vanuatu, Hilaire Bule i

tok gavman bilong Frans i bin oraitim dispela visa-fri travel long wik i go pinis.

Em i tok aninit long en, ol pipel bilong Vanuatu husat i gat paspot, i no nidim visa long go stap long Nu Kaledonia insait long tripela mun long wanwan taim.

Mista Bule i tok, long pas-

taim, em i hat tru long ol Ni-Vanuatu long go long Nu Kaledonia.

Em i tok tu olsem dispela Visa-fri travel i go long Nu Kaledonia we Frans i oraitim, i no minim Vanuatu gavman i senisim tingting blong en long Nu Kaledonia i kamap indipenden kantri.

New Dawn FM long Bogenvil bai go long Saut na Solomons

Sam Seke i raitim

LONG mun Novemba dispela yia, ol pipel long Saut Bogenvil i ken harim gut New Dawn FM radio brotkas long nupela trensmita bilong ol long Buin taun.

Menesing bilong New Dawn FM, Aloysius Laukai i tok, i kam inap nau planti pipel long Saut

Bogenvil i save harim tasol brotkas we i kam long SIBC bilong Solomon Ailan.

Mista Laukai i tok taim ol i wokim brotkas long Buin, bai ol pipel long westen hap bilong Solomon Ailan i ken harim gut tu New Dawn FM brotkas.

Komyuniti FM radio ya i wok long gro bikpela moa, maski long hevi nau long

mani long Papua Niugini na tu long Atonomas Bogenvil Rijen.

Mists Laukai i tok taim ol i painim hat tru long sait long mani long ranim brotkas sevis, narapela han bilong radio ol i kolim Tambolema Holding i go insait long ekspotim kopra i go long Filipins long helpim ol.

RAMSI skul droing long Intenesenel De bilong Bel Isi

Sam Seke i raitim

SPESEL Kodineta bilong Rijnol Asistens Misin long Solomon Ailan ol i kolim long RAMSI i tok belisi i stap long kantri nau long wanem, gavman na ol pipel long kantri yet i laikim pis o gutpela sindaun.

Quinton Devlin i tok

RAMSI i bin kamap long Solomon Islands long 2003, i helpim tasol long kamapim laik bilong kantri long lukim pis gut gavman na strongpela ikononi.

Mista Devlin i mekim dispela toktok taim em i toktok long ol pikinini long Honiara Baptis Sios Akademi Church bilong makim Intenesenel

De bilong Pis.

RAMSI Pablik Afeas na Midia Menesa, Johnson Honimae i tok RAMSI i bin ranim wanpela kompetisen long skul ya long droim piksa long sait long pis na i givim prais long ol pikinini.

Ol pikinini husat i win nau i Nishani Maniau, Jared Lilivar na Glen Aree.

Barola yut tromoi gan na bai planim kopi

James G. Kila i raitim

husat save ran long PMV bas na ol trak i save pret long en.

BAROLA maunten long Okuk Haiwe namel long Kainantu na Henganofi em wanpela ples planti lain

Dispela eria em planti raskol pasin na stil pasin i save kamap long nait na de taim tu.

Ol yut i save sanap wantaim gan na stopim ol bas na trak na stilim ol samting. Dispela pasin i givim nem nogut long dispela ples na ol polis na pablik i save tingting nogut long Barola eria.

Long las wik insait long wanpela seremoni, Gavana bilong Isten Hailans, Julie Soso i bin stap long Barola long opim Barola Kopi Kopretiv grup na i givim bikpela tok amamas na luk-save i go long ol yut bilong Barola long senisim pasin na laik kamapim gutpela senis insait long komyuniti.

Gavana Soso i bin tokaut long helpim Barola Kopretiv grup wantaim K100,000 na i tok long helpim developmen bilong kopi projek.

Long Epril, 2015 Kopi Industri Kopresen i bin lukluk raun i go long Barola eria na bung wantaim lida bilong ol Barola yut, Nime Miefia, long wanpela wok awenes.

Ol CIC wokman i go kam na toktok wantaim ol yut long planim kopi na tu, kamapim dispela kopretiv grup long helpim na senisim laip bilong planti yut husat pastaim i save mekim raskol na stil pasin long Barola maunten.

Long dispela taim ol i opim

nupela kopi neseri inap holim 20,000 sidlings kopi na tu, ol i opim wanpela sentral wet kopi mil wantaim wanpela risos senta.

Barola kopretiv grup i gat 50 memba na sampela moa nupela memba i laik joinim we i bringim total namba i go long 111 memba.

Isten Hailans Provinsal Polis Komanda, Suprintenden Alex N'Drasal i bin stap na em i givim bikpela tok amamas long ol yut bilong Barola. Em i tok olsem em bai toktok strong long sanapim Haiwe Patrol bes bilong Hailans rijon i sanap long Barola maunten.

PPC D'Ndrasal i tok plen bilong wokim polis haiwe patrol bes i stap pinis na em bai pusim moa long wok i mas kamap.

Em i tok dispela em nupela sapta long Barola na laip bilong ol yangpela man bai senis taim ol i stat long groim kopi na lukautim, na salim long kisim mani long helpim sindaun bilong ol famili na komyuniti.

Em i tok nem Barola em nem nogut tru long provins na Hailans rijon, tasol tude em i tokim kantri olsem komyuniti nau long Barola i senis.

Kampani bilong gavman i no ran gut

OL Stet on Entaprais (SoE) o kampani bilong Gavman i mas apim level bilong ranim kampani na mekim bisnis gut wantaim mani gavman i save givim ol long olgeta yia.

Tresera Patrick Pruaitch i tok pefomens level bilong planti ol kampani bilong Gavman i pundaun na ol i no mekim gut bikpela winmani bikos operesen bilong kampani i no ran gut tru olsem ol arapela praiwet kampani.

Mista Pruaitch i givim dispela salens toktok long olgeta ol bod memba, menesing dairekta, ol sif ekesekektiv opisa na ol senia menesmen lain bilong ol kampani bilong gavman.

Em i mekim dispela toktok long las wik taim em i laik lonsim wanpela ripot bilong fainensal pefomens na ol operesen bilong ol SoE insait long PNG na Pasifik.

Asian Development Bank (ADB) i bin kamapim dispela ripot na ol i painimaut olsem PNG na arapela 7-pela kantri insait long Pasifik

Dispela ripot i tok Gros Domestik Prodak (GDP) ol SoE i save givim em stap namel long 1.8 na 12 pesen.

Maski ol SoE i gat bikpela

aset o ol samting, gavman i wok long givim moa mani long ol long wan wan yia, na ol i no gat bikpela kompetisen, tasol pefomens o wok bisnis bilong ol i gutpela tumas na planti i no save mekim winmani, ripot i tok.

Dispela ripot i tok long PNG, ol kampani bilong gavman i save mekim liklik winmani, olsem 2.4 pesen bilong mani gavman i save givim olsem ekwiti long statim operesen.

"Gavman i mas lukluk moa long dispela bikos em i wanpela bikpela asua," Laure Darcy bilong ADB i tok.

Mista Pruaitch i tok Gavman i save kisim planti dinau mani long givim i go long ol SoE taim ol i save sot long mani long ranim kampani.

"Ating mipela mas kamapim wanpela polisi bilong mekim na yusim winmani. Invesmen i wok long go antap tasol winmani ol SoE i mekim em i no planti tumas," Mista Pruaitch i tok.

Em i tok gavman i laikim ol SoE long apim level bilong pefomens bilong ol na mekim winmani long givim i go bek gen long gavman bikos gavman em i seaholda bilong olgeta SoE.

Digicel givim K15 roming bandol long kastoma

OL pripeid kastoma bilong Digicel husat i laik go raun long Australia, New Zealand, Fiji, Nauru, Samoa, Tonga na Vanuatu bai inap long yusim ol mobail fon namba na akaun bilong ol long K15 tasol.

Wanpela servis bilong Digicel ol i kolim Deli Intanesenel Roving Bandol servis i larim ol kastoma i kisim dispela servis.

Ol pripeid kastoma bai no inap long senisim mobail namba na akaun bilong ol sapos ol i stap long PNG na i laik go raun long dispela ol kantri insait long Pasifik.

Digicel i kamap namba wan telekomyunikesen kampani long givim dispela kain servis long ol kastoma long PNG.

Dispela servis servis bai helpim ol kastoma bilong Digicel long PNG long toktok moa wantaim ol poroman na wa lain o bisnis manmeri long yusim mobail pon namba bilong ol na mekim kol long laik bilong ol yet.

Menesing Dairekta bilong Digicel Mobile, Shivan Bhargava, i tok Digicel i wok long kamapim planti nupela servis long givim gut servis long

kastoma.

"PNG i stap klostu long Austalia, Nu Silan na arapela ol kantri insait long Pasifik rijon. Mipela i sav olsem planti ol manmeri PNG i save raun go long ol dispela kantri, na mipela i les long ol i senisim sim kad o senisim mobail fon namba bilong ol taim ol i stap ausait long PNG," em i tok.

"Mani mak long kisim nupela Deli Intanesenel Roving Bandol servis em i K15 long wan wan de na dispela bai gat 100 minit long mekim kol, 100 SMS na 100MB data.

"Ol kastoma i ken kisim dispela bandol taim ol i tek-sim 'Roam101' i go long namba 16446. Ol bai kisim bekim long wapela takis mesis na kisim intanesenel roming bandol bilong ol.

"Dispela servis bai helpim ol kastoma long toktok wantaim ol poroman, famili na bisnis patna bilong ol long PNG taim ol i go stap o raun long ovasis long dispela ol kantri insait long Pasifik rijon.

"Ol kastoma bai inap long yusim ol namba bilong arapela mobail fon long dispela kantri we ol ba go raun o go stap," Mista Bhargava i tok.

Ol seaholda i sapotim InterOil long salim kampani

PLANTI ol seaholda bilong InterOil Corp i sapotim ol memba bilong bod na senia menesmen tim long salim kampani i go long ExxonMobil, InterOil i tok.

InterOil Corp i tok olgeta seaholda bilong em i wanbel long larim ExxonMobil i baim kampani wantaim ol samting bilong em long Petroleum Ritensen Laisens (PRL) 15 long Elk-Antelope ges fil long Galp Provins.

"Planti ol seaholda bilong InterOil i vot long sapotim eksen na plen bilong ol bod ov dairekta bilong InterOil long larim ExxonMobil i

baim kampani wantaim ges fil na risev long Elk-Antelope," InterOil i tok.

Long wanpela maket ripot InterOil i givim i go aut long stok maket, em i tok InterOil i gat bikpela sapot bilong ol seaholda long salim kampani.

Spesel Miting bilong ol seaholda bilong InterOil i bin kamap long New York City long Amerika long las wik Fonde.

InterOil i tok moa long 80 pesen bilong ol seaholda i sapotim plen bilong bod na i vot long salim kampani.

Siaman bilong InterOil bod ov Dairekta, Chris Fin-

layson, i tok: "Mi laik tok tenkyu long olgeta seaholda bilong InterOil long wanbel long dispela plen bilong kampani long groim na strongim veliu bilong sea bilong ol."

Mista Finlayson i tok taim ExxonMobil i baim InterOil, ol seaholda bilong InterOil bai kisim mani long wan wan sea ol i gat, na tu ol bai kamap seaholda bilong ExxonMobil.

ExxonMobil em wanpela bikpela intenesenel oil na ges kampani bilong Amerika wantaim planti bikpela oil na ges projek long wol.

ExxonMobil em i opereta bilong PNG LNG Projek.

Taim em i baim InterOil wantaim PRL 15 Elk-Antelope ges fil, ExxonMobil bai kamap opereta bilong namba tu LNG projek long kantri, Papua LNG Projek.

Mista Finlayson i tok ol bod ov dairekta bilong InterOil i stap redi long wok-bung wantaim ExxonMobil long pinisim ol pepa wok na arapela wok long salim InterOil.

"Mipela bai pinisim long pepa wok long pinis bilong mun Septemba long dispela yia," Mista Finlayson i tok.

Buy Your Air Niugini Ticket
Anywhere, Anytime
Using BSP Mobile Banking.

Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.



Air Niugini
www.airniugini.com.pg



Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicesbsp@bsp.com.pg www.bsp.com.pg

Kokoda laip seiva nau sevim mani

MOA long 50 helt volantia woka i opim ol namba wan benk akaun bilong ol wantaim helpim bilong Kokoda Inisetiv Developmen Program (KIDP).

Ol BSP rurel ejen i go long Kokoda na Sogeri long helpim ol Viles Helt Volantia (VHV) long mekim ol pepa wok bilong opim ol benk akaun.

Ol VHV i save kisim ol alauens taim ol i save mekim wok bilong helt patrol wantaim Kokoda Inise-

tiv na ol narapela wok. Nau ol i ken kisim alauens bilong ol long benk akaun bilong ol yet na bai ol i no ken bungim birua bilong karim ol bikpela kes mani i go long ol ples i stap longwe long bus.

KIDP em i wanpela hap bilong patnasip namel long PNG na Australia long wok bilong helt, edukesen na senitesen long hap bilong Kokoda korido. Em i bin stat long sapotim ol VHV program long Kokoda Trek stat long 2009.

KIDP Komyuniti na Palbik Helt Opisa, Dulcie Mausen i tok olsem ol volantia i save stap long ol viles na i no gat benk o ol narapela pablik sevis na ol bai i no inap long opim ol benk akaun ol yet, sapos program i no helpim ol.

“Planti bilong ol lokal pipel long hia, em i nupela samting tru na ol i amamas tru long lukim,” em i tok.

“Nau ol i ken lainim wei bilong sevim na lukautim mani bilong ol gut. Dispela bai helpim wok bilong

program opisa long go long ol komyuniti long mekim wok bilong ol. Mipela bai i no inap long karim mani olsem mipela i save mekim long bipo,” Mausen i tok.

David Tonogo bilong Kanandara ples long Kokoda i bin stat wok olsem wanpela VHV inap 7-pela yia. Em i tok, em i no bin gat wanpela benk akaun bipo.

Ol VHV i save mekim bikpela

wok long ol rurel ples. Ol i kisim trening long besik helt ken a ol i save wok olsem ol medikol woka long Kokoda trek. Ol i save givim han tu long ol helt projek, na ol i save sapotim helt woka long wok bilong ol long rurel helt senta.

I gat 96 VHV nau i gat trening i save wok logn Kokoda Trek na ol i save givim helt sevis long 18,000 pipel.

Susu bilong kau i senisim laip bilong ol fama long Senegal



La Laiterie du Berger i kamapim gutpela bisnis bilong deri, olsem susu bilong kau long kantri Senegal long Afrika.

LAIT bilong san i pas long han bilong Abu Sow. Em i wanpela man Senegal. Em i sanap isi long lukluk long wanpela meri bilong em i wok long kisim susu long ol kau bilong famili.

Sapos yu askim em hamas kau em i gat bai em i no inap tokaut stret, nogat. Ol i bilip sapos ol i tokaut long namba bilong kau bai wanpela samting nogut i kamap long ol. Olsem na bai em i bekim tasol olsem, “Ating 100 samting.”

I no longtaim, Sow i lukim motobaik bilong kisim susu i ran i kam. Dispela motobaik i gat ol spesel sospen bilong pulmapim susu bilong kau. Meri bilong em Coumba Diallo i lukim motobaik na em i stop long bengim susu bilong ol kau. Em i kirap kapsait susu i go insait long dispela sospen.

Man bilong kisim susu i mas testim susu pastaim na bihain em i raitim daun hamamas susu famili i salim long moning. Orait em bai lusim ol na ran i go long narapela hap gen long baim susu.

Dispela man bilong baim susu na tripela wanwok bilong em i mas go lukim 300 famili stat long 6 klok moning na ol i mas go bek long Dolima susu faktori bipo long san i strong tumas na susu i bagarap. Sampela famili i save bungim susu olsem na wan wan man i mas stop 30 taim long kisim ol susu bilong kau.

Tude, Sow i wanpela maniman. Em i gat foapela meri. Lo bilong kantri i tok man i no ken abrusim dispela mak. Tasol 8-pela yia i go pinis, famili bilong em i stap tarangu. Ol i no gat rot bilong salim susu bilong kau na ol i save kapsaitim.

Klostu olsem 4 milien pipel bilong Senegal, samting olsem 30 pesen bilong populesen, i save lukautim ol kau. Tasol ol i save dringim paura susu i kam long ol arapela kantri olsem Irelan.

Klostu 10-pela yia i go pinis, Bagore Bathily, wanpela dokta bilong ol enimal i luksave long hevi bilong ol dispela fama husat i save salim enimal bilong ol long liklik mani tru. Orait em i stat long painim rot bilong helpim ol dispela fama.

“Ol i strongpela pipel husat i stap long ples wesana tasol ol i no gat rot bilong painim mani. Ol i gat save tasol i mas

painim rot bilong salim ol samting. No gat man i laik baim ol susu ol i salim,” em i tok.

Long 2006, Bathily statim bisnis bilong em, La laiterie de Berger long Richard Toll, wanpela taun i stap namel long ol dispela ples klostu long boda bilong Mauritania. Em i stat long baim susu na boilim long kilim ol jerm nogut na wokim yogat. Em i salim long Dakar, bik-taun bilong Sengal na ol narapela siti.

Ol man i kolektim ol susu i save kamap bek long faktori long 10 klok moning na putim ol baket susu antap long ol bikpela stil tebol. Bai ol i skelim, strenim na testim pastaim na putim long frisa.

Ol i save boilim susu inap long mak bilong 97 digri sentigret inap tripela minit. Dispel pasin i bilong kilim ol jerm insait long susu. Orait bihain ol i wokim yogat na fementet milk, putim long ol grinpela botol na putim nem Dolima long ol na salim i go long ol bikpela siti long Senegal long ol frisa trak.

Dispela kampani i wok long gro long mak bilong 30 pesen long wan wan yia na tude em i namba tu bikpela kampani bilong wokim susu long kantri. Ardo, wanpela kampani bilong Lebanon i namba wan, tasol Bathily i ting bai ol i winim em bihain long 5-pela yia.

La Laiterie de Berger tasol i save salim susu bilong ol kau bilong Sengal, tasol ol i save miksim wantaim paura susu bikos moa pipel laikim dispela susu. Fres susu em i hatwok long wokim long kantri welples i save hat tru na ol i mas go kisim long ol ples insait long 32 kilomita long olgeta de. I no gat rot bilong kar olsem na ol famili i save wetim motobaik i go kisim susu bilong ol kau bilong ol. Sampela taim susu i save bagarap bipo long em i kamap long faktori.

Tude tupela bikpela bisnis i gat 45 pesen sea tu long Le Laiterie de Berger tasol Bathilyi tok bai em i wok long helpim yet ol kau fama. Em i save baim ol kaikai bilong kau na salim long liklik prais i go long ol fama. Em i tok dispela “crazy milk of the desert” bai i stap namba wan yet long bisnis bilong em. Dispela bisnis i senisim laip bilong planti ol famili na em i laik helpim ol yet.

WHITE TUNA FLAKES
DIANA White

WHITE TUNA insait
K 2.20

DIANA
Barbecue Flavour

*Tasty and Flavourful
White Tuna for Everyone!*

Manufactured by:
RD Tuna Cannery Ltd.

Ol Storm i daunim ol Raider

OL Melbourne Storm i bagarapim driman bilong ol Canberra Raider long kism premiasip bilong 2016 NRL sisen long las wik Sarere nait, tasol ol i gat narapela salens i stap yet long dispela wik Sande.

Melbourne i daunim ol Raider, 14-12, long preliminieri fainal long AAMI Park tasol skoa lain i no bikpela we tupela tim wantaim i bin pilai strong.

Kepten bilong ol Raider, Jarrod Croker, i bin kism bagarap long skru bilong em long namba 11 minit bilong resis taim na Joey Leilua tu i

no pilim orait taim 10-pela minit i stap yet long bungim pinis bilong resis na namba bilong ol i kam daun gen long 12 man skwat.

Fulbek, Jack Wighton, i lusim ol tim poro taim ol i rausim em long 59 minit bihain long em i bin mekim wanpela strongpela takol long birua pilaia, Marika Koroibete.

Long dispela taim, Cheyse Blair i putim wanpela trai na skipa bilong ol Storm, Cameron Smith, i kism tupela poin long wanpela penelti kik na skruim skoa i go antap long 8 poin.

Blake Austin bilong ol

Raider i tok olsem mipela i bin pilai gut, tasol mipela i painim hat long putim trai klostu long pinis bilong resis.

“Ol Storm i pilai gut na mi laikim olsem ol i mas go het na winim gren fainal,” Austin i tok.

Austin i amamas long kala bilong tim bilong em egen-sim ol maina premia.

I gat sampela salens i stap, tasol ol Raider i pait yet. Sapos winga, Edrick Lee, i no dropim bal palnti taim, risal i ken kamap narapela wei.

Lee i misim bikpela sans we em i bin dropim bal long 57 minit na 70 minit.



Blake Austin i salim bal.

Smith i amamas long salensim Gallen

KEPTEN bilong Melbourne Storm, Cameron Smit, i amamas long birua bilong em, Paul Gallen, i kism ol Cronulla Shark i go long gren fainal resis.

Skipa bilong Stet ov Orijin, Cameron Smit, bai resis long ol fainal long namba 6 taim bilong em long dispela yia we ol bai salensim ol Shark bihain long ol i win long preliminieri fainal egensim ol Raider.

Smith i kamap wina tripela taim long ol 5-pela resis i kamap namel long dispela yia, we tupela long Stet Ov oOijin resis egensim ol Blues na namba tri win em long raun 26 bilong NRL resis.

Smith i save gat planti sans long go long gren fainal, tasol dispela em i namba wan taim bilong Gallen long pilai long gren fainal resis long dispela sande.

“Mi save amamas long pilai egensim Gallen long namel bilong ol NRL sisen,” Smith i tok.

“Mi amamas long Gallen bikos em i save wet planti taim long go long gren fainal. Em i save pilai strong long kism ol Cronulla i go long gren fainal na nau driman bilong em i karim kaikai.”

Smith i winim 27 gem bilong ol 40 gem we em i save pilai egensim Gallen long Orijin o klap level.



Paul Gallen wantaim pikinini meri bilong em

Bipo NRL pilaia, Jamie Dowling, i go long kalabus

BIPO pilaia bilong Nesenel Ragbi Lig klap Gold Coast Titan, Jamie Dowling, i bin go long kalabus insait long 200 aua bilong komyuniti sevis na baim \$500 bihain long ol i painim aut olsem em i saplaim kokein o spakbrus.

Em i gat 25 yia krismas, i wanpela bilong ol 7-pela bipo na nau pilaia we ol i holim pasim em long kraim na Korapsen Komisnin i mekim wok painim aut na holim Karmichael Hunt.

Ol i bin sasim Dowling long mun Februeri bilong yia

i go pinis bihain long ol polis i painim aut wanpela teks mesej i kam long bikpela drag dila, John Touma.

Nau, Sautpot Distrik Kot i salim Dowling i go long kalabus long stap tupela yia aninit long 7-pela kaun bilong em i holim spakbrus.

Kot i harim olsem Dowling i bin baim 18 grem spakbrus namel long Jun 6 na Oktoba 4 long yia 2014.

Em i baim \$500 na i kam aut long 200 aua long kism komyuniti sevis long tupela kaun bilong saplaim spakbrus.



Jamie Dowling.

Mclroy i winim Tua Sempionsip

RORY Mclroy i rol i go long long foa mita put long namab foa hol long plei-of na daunim Ryan Moore long USPGA Tua Sempionsip na winim \$US10 milien lon FedEksKap.

Wantaim plei-of win prais na \$US1.53 milien sek bilong wina, foapela taim meja sempion, Mclroy i kism \$US11.53 milien long Is Lake long Atlanta, Georgia.

Wol namba tu, Dustin Johnson, i pinisim resis long namba 6 ples, tasol bihain long em i kam insait long fainal bilong sisen long top ples long FedEksKap, em i



Roy Mclroy i winim FedEksKap.

ken winim plei-of bones, sapos Moore o Kevin Chappell i winim tonamen.

Ol i eliminetim Chappell

long namba wan hol bilong plei-of na Moore i go aut long tri mita put long namba wan plei-of hol.

NFL pilaia i protes yet egensim bagarap polis kamapim


OL NFL pilaia i kempen long protes egensim ol polis long ol i sutim ol Afriken na Ameriken pipel i go het long ol gem long Mande, we planti pilaia i apim han bilong ol long taim bilong nesenel entem.

Dispela protes i stat kamap wantaim bekap kwatabek bilong San Francisco, Colin Kaepernick i mekim disisen olsem em bai no

inap long sanap long singim entem long taim bilong ol presisen gem.

Collin i salim dispela toktok i go long ol pilaia bilong narapela tim na bikpela toktok i kamap long ol long wik i go.

Kwatabek bilong Carolina Panther, Cam Newton, i werim wanpela t-siot na tromoi han i go antap long protes.



Ol pilaia bilong Redskins i tromoi han i go antap long taim bilong nesenel entem na i soim olsem ol i protes.



Basamuk Port Dipatmen las lain long lukim MHP go aut



Wanpela grup bilong ol lain wokman bilong Basamuk Port i redi long lodim MHP long sip.

LONG dispela wik yumi bai glasim gutpela wok ol lain long Basamuk Wharf/Port Dipatmen i save wokim long stretim gut spes long salim ol miks haidroksaid prodak (MHP) antap long sip long lusim kantri na go ovasis.

Dispela dipatmen save wok hat tu long rausim ol saplai i kam long Basamuk Rifaineri

Saluk Wang em tim lida bilong ol wokman husat save wok long bikpela bris long Basamuk Port. Bagaros ya Saluk em bilong Bagabag ailan long Sumkar distrik, tasol em i wok longpela taim long Basamuk long konstraksen taim yet long 2008 i kam inap 2011 em i joinim Ramu NiCo (MCC). Tude em wanpela gutpela sevisman long wof/port dipatmen long BSK

na planti lain i save rispek long gutpela wok na pasin bilong em long go pas long ol arapela nesenen wokman long BSK Port.

Saluk i tok olsem ol wokman bilong em i save mekim planti kain kain wok long bris. Tasol bikpela wok ol i save mekim em taim ol i save lodim MHP antap long ol bikpela sip long karim i go ovasis. Narapela wok tu em ol save rausim ol kago o saplai i kam long ovasis long helpim wok operesen long Basamuk Rifaineri.

Saluk i stori olsem pastaim long ol i mekim wok long lodim sip wantaim MHP, ol i mas redim loding-plen bilong ol. Em i tok plen bilong bikpela sip em Kepten bilong sip i save salim i go long Ramu NiCo Port suprintenden na em save

givim i go long Saluk long redim.

“Bihain long mi kisim plen, mi save skelim na redio i go long kepten long wanem sait sip bai kam sua long bris long Basamuk bris, na mipela save redim plen,” Saluk i tok.

Bihain long em i redim loding plen pinis, em save karim plen bilong em i go antap long sip na tok-tok wantaim Sif Opisa bilong sip na ol bai skelim tupela plen olsem ol mas wankain. Bihain long agrimen i kamap nau em sip bai i ken go sua na ol lain bai redim sapos sip bai sua long stabot sait o long Portsaid.

Saluk i tok klia tu olsem taim em i kisim ripot na agrimen long wanem sait sip bai sua long en, em i save tok save na ol wokman bilong em save redim ol paip na hos



Saluk i redim liklik masin long pulim bikpela rop long holim sip long taim em sua.

i go long bris long sip i ken kisim fiul. I gat tupela kain valv i stap, wanpela em long alkalain em ol i save yusim long rausim ol bikpela esid i kamaut na narapela em long hevi fiul.

Taim olgeta agrimen i orait na ol strongpela lain bilong lodim sip bai stat. Ol save yusim foklip wantaim ol bikpela krein long apim ol wantan MHP long lainim insait long asis bilong sip.

Saluk i tok olsem ol i save lainim ol MHP long ol leiya o wei bilong lainim insait long asis bilong sip. Em i tok olsem sapos sip i liklik ol i save lainim olsem 5 i go 6 leiya. Tasol taim bikpela sip i kam long lodim MHP, ol save mekim 8 i go 10-pela leiya.

Saluk i tok olsem i gat tupela lain

grup wokman o tim we i save wok long de na nait sift long lodim na rausim kago long sip i sua long Basamuk bris. Narapela tim lida husat i wok wantaim Saluk em Francis Kasong, em wanpela bagaros bilong Raikos yet.

Ol strongpela lain boi insait long Basamuk port/wof dipatmen em i gat 31- man. Dispela namba em Saluk yet wantaim tupela arapela em ol wokman bilong Ramu NiCo Menesmen (MCC) na ol arapela em ol kontrakta bilong Raibus Engineering Limited (REL).


Dispela ol tim long BSK Wof/Port em ol trupela lain bilong wok hat stret. Ol save amamas na stap wantaim long strongim het-tok bilong Ramu NiCo em “Wanpela Ramu NiCo, Wanpela Komyuniti”.



Tim lida long Basamuk Port, Saluk Wang i soim tupela valv bilong alkalain na hevi fiul long go long sip.



Tim i wetim bikpela sip long Basamuk bris.



KOSA bilong NGCB PNG Praim Minista XIII, Michael Marum, i tok olsem sait bilong em i no pilai gut long stat bilong resis i go inap long pinis bilong resis.

Long bung wantaim ol nius lain i kamap bihain long Australia i daunim PNG, 58-0, long Praim Minista XIII resis, Marum i tok, "PNG i no stat pilai gut na ol no luk-save long asua bilong ol i go inap long resis i pinis."

"Banis bilong mipela i no strong we ol Australia i bin putim trai long namba 10 minit bilong resis taim na mipela i no inap long stopim ol long dispela hap, nogat.

"Mipela i gat planti sans i stap, tasol mipela i no inap long ranim bal i go las takol na mipela i dropim bal planti. Na tu, ol i kisim planti penelti egensim mipela.

"Dispela em i wanpela hap we mipela bai lainim gut na go het long pilai," Marum i tok.

Marum i tok moa olsem ol bai lukluk moa long strongim banis na takol ol i mekim egensim ol birua pilaia bipo long Wol Kap resis bai kamap long yia i kam, 2017.

Marum: Mipela bai lainim na pilai yet



Kepten bilong NGCB PNG Praim Minista XIII, Bernard Goma, na kosa, Michael Marum, i sindaun wantaim bihain long pinis bilong 2016 Praim Minista XIII resis.

"Mi pela i gat sampela gut-pela pilaia long gem we mipela bai lukluk long makim ol long skruim ol skwat bilong Wol Kap resis," Marum i tok.

Long wankain taim, kosa bilong Australian PM XIII, Mal Meninga, i tok olsem kala bilong ragbi lig long PNG long bihain taim i sain yet i stap.

"Mi ting olsem kala bilong

PNG long Sarere nait i kamap namba wan," Meninga i tok.

"Ol i bin pilai egensim wanpela bilong ol namba wan tim long wol ol i pilai gut. Kala bilong ragbi lig long PNG bai kamap namba wan long bihain taim," Meninga i tok.

Em i tok moa olsem planti ol pilai bilong PNG i pilai gut.

"Hap bek pilai i kamap namba wan na Justin Olam i

bin pilai gut," Meninga i tok.

Meninga i pinisim toktok na i tok olsem, ol bai lukluk gut long makim fainal skwat bilong Foa Nesen resis bai kamap klostu taim.

"Mipela i bin kam long hia bikos mipela i laik yusim dispela resis ol traime pilai long makim ol skwat bilong Foa Nesens na Wol Kap resis," Marum i tok.

RD Fishing namba wan kampani long rejista long kopret golf tonamen

James G. Kila i raitim

RD Fishing em i namba wan kampani long rejista wantaim K1000 long pilai insait long kopret golf salens olsem fanresing bilong Tim Madang long pilai long PNG Gems long Kimbe, Wes Nu Briten provins neks yia.

Long las wik Fonde, RD Fishing Komyuniti Rilesens menesa, Greg Magulis, i givim K1000 sek olsem rejistresen bilong kampani tim i go long Madang provins Komyuniti Dvelopmen Asisten Dairekta, Joe Bande,

Bande i tok tenkyu long RD Fishing long soim sapot bilong en olsem bikpela kampani long Madang long

helpim Tim Madang.

Magulis i tok RD Fishing i amamas long helpim Madang komyuniti wantaim mani helpim i go long spots na ol arapela samting bikos em bai helpim long developmen bilong provins.

Em i tok sapotim spots i ken helpim long daunim lo na oda hevi long provins bikos ol yangpela manmeri bai givim moa taim long pilai, na lus tingting long kamapim ol bikhet pasin.

Bande i tok dispela golf tonamen bai kamap long neks mun na bai gat 22 kopret tim i pilai insait long dispela wanpela de tonemen. Tonamen bai yusim 9-pela hol long Madang Golf klap



Jeneral Menesa bilong Wass Matau Limited, Danny Gabong, i salensim ol bisnis haus long Madang long givim helpim na sapotim spots na Tim Madang long go long PNG Gems. Poto: James G. Kila

long ol tim i resis.

I no long taim i go pinis, lokal lenona kampani, Wass Matau Limited, i bin givim helpim tu i go long Madang volibal skwat wantaim nupela trening yunifom na ol bal.

Long dispela taim, Jeneral Menesa bilong Wass Matau Limited, Danny Gabong i bin givim bikpela salens long ol bisnis haus long helpim

spots bikos spots i ken helpim long daunim lo na hevi insait long komyuniti.

Gabong i tok, i nogat wanpela as tru i stap we ol bisnis haus no inap sapotim spots. Liklik sapot wantaim mani o samting i go long spots i ken mekim bikpela samting na helpim stret i go long ol yut na tu kamapim gutpela tenis long pasin bilong ol yangpela manmeri.

TPNG i sapotim FIFA Wol Kap

BIKPELA telikomyunikesen kampani long Papua Niugini, Telikom PNG (TPNG), i tokaut olsem em i sapotim 2016 FIFA Anda-20 Wol Kap resis bilong ol meri bai kamap klostu taim.

Telikom PNG i tok long givim mani mak long 1.5 milien kina aninit long ol sevis ol bai redim bilong FIFA Anda-20 Wol Kap resis bilong ol meri olsem em i opisal telikomyunikesen sevis provaida bilong dispela tonamen.

"Dispela kontribusen bai helpim ol lokal long kari-maut wol klas resis long Novemba na mipela i lukluk long wokbung wantaim ol na ol narapela patna bilong yumi i ken soim kala bilong ol long intenesenel futbol resis bilong PNG na Osenia Rijon," Presiden bilong PNG Futbol Asosiesen, David Chung, i tok.

Telikom PNG i join wantaim Air Niugini olsem nesenel sapota bilong dispela resis wantaim ol global patna bilong FIFA olsem Kia Motors, Adidas, Coca Cola, Visa, Wanda Grup ov Kampani na Gazprom.

"Aninit long ol 6-pela nesenel sapota, Telikom PNG na Air Niugini i apim han pinis na ol pipel bilong PNG i ken amamas long dispela tupela kopret kampani husat i go pas wok bung wantaim FIFA resis," Chung i tok.

"Mipela i save olsem planti kopret kampani bai kam insait long kisim ol 4-pela spes i stap yet bilong helpim mipela long karim aut dispela resis gut. Na long wankain taim, ol bai i gat namba wan sans long promotim brend bilong ol long intenesenel komyuniti na wol."

Telikom i poroman wantaim futbol long PNG long bikpela taim na i sapotim bikpela lig bilong Papua Niugini Futbol Asosiesesen inap long yia 2017.

Chung i tok, "Sapot bilong kampani long 2016 FIFA

Anda-20 Wol Kap resis bilong ol meri em i namba wan samting we Telikom i redim bilong futbol long palnti yia i go na mipela i gat bikpela amamas olsem ol i sapotim long go pas long bikpela futbol resis bai kamap long kantri bilong yumi."

Aninit long dispela patnasip, Telikom bai redim fiks lain telikomunikesen sevis, waiales telikomunikesen sevis na wailes telikomyunikesen end-yusa sevis.

Na tu, kampani bai redim fon lain na hap bilong go long intanet long olgeta 4-pela stediam we resis bai kamap insait long tripela wik.

"Long yia 2015, Telikom PNG i givim namba wan brodkas bilong Pasifik gems insait long kantri na ol kantri insait long Pasifik Ailan.

"Nau mipela i lukluk long soim PNG long wol taim PNG i go pas long FIFA Anda-20 Wol Kap resis bilong ol meri.

"Olsem bikpela kopret sponza bilong futbol long kantri aninit long nesenel lig, em i strongim mipela long lukim ol lokal pilaia na tim bilong mipela long resis long rijon na wol tonamen.

"Dispela i givim mipela amamas tingting we spon-sasip bilong mipela em i bilong divelopim yangpela na namba wan futbol pilaia bilong mipela na soim rot bilong sapotim na go pas long dispela kain bikpela resis olsem FIFA long kantri," Sif Eksekutiv Opisa bilong Telikom, Michael Donnelly, i tok.

Telikom PNG bai redim ol telikomyunikesen sevis we ol bai nidim long karim aut Wol Kap resis bai kamap long Novemba bikos em i namba wan samting long taim bilong tonamen we lukluk bilong moa long 200 milien manmeri bai kamap long PNG.

Wol bai luksave long PNG long taim bilong resis bai kamap long 13 Novemba i go inap long 3 Desemba.

Flies i win long POMRFL gren fainal

WANPELA fil gol i bin kamap long namba 77 minit bilong resis taim i pasim 7-6 win, we ol Hohola Flies i daunim ol Richard Wagambie Paga Panther long Pot Mosbi Ragbi Futbol Lig gren fainal resis bilong ol man long las wiken.

Long A gret resis, ol Flies i stap pas wantaim 6-0 poin long namba wan hap bilong resis we pilaia bilong ol Flies, Jimmy Kepon, i bin putim trai long namba 26 minit.

Ol Panther i traime long bungim dispela poin long planti taim tasol ol Flies i strongim banis bilong ol na ol Panther i painim hat long bungim traime lain.

Long namba 50 minit bilong resis taim, referi i bin givim wanpela penelti egensim ol Flies na ol Panther i bin kisim tupela poin long penelti kik.

Ol i bin bungim skoa bilong ol Flies, 6-6, bihain long 7-pela minit i stap yet bipo long

bungim pinis bilong resis, we Mark James i putim trai long wing.

Bipo hap bek bilong SP Hunter, Roger Laka, i painim hat long kikim konvesen i go insait long sait lait na 5-pela minit tasol i stap long bungim ful taim.

Ol Flies i laki we hap bek bilong ol, Benton Leme, i bin stap longwe mak long 20 mita na kisim wanpela fil gol long 77 minit na skruim skoa i go antap, 7-6.

Ol Flies i go het na strongim banis bilong ol na i winim 22,000 prais mani na ol Panther i kisim K10,000 long ol i kamap namba tu long resis.

Long POMRFL gren fainal resis bilong ol meri i bin kamap pas long Praim Minista XIII long las wik Sarere apinun em, ol Royals i daunim ol Paga Panther, na long anda-20 gran fainal resis bilong ol man em, ol Saut i daunim ol Brother, 4-2.

Kassman bai developim program bilong Taekwondo kosa

NESANEL Taekwondo Kosa bilong Papua Niugini, Edward Kassman i laik lukim ol yangpela kosa long spot bilong em long developim gutpela andastending na trening program.

Kassman i tingting long lukim planti lokal kosa long PNG long kamap gutpela gutpela kosa we dispela bai kamapim gutpela rot bilong ol etlit bilong ol i go antap long intenesenel level.

Long helpim em long dispela tingting, Kassman i go skul long Intenesenel Kosing Enrismen Setifiket Program (ICECP) long Yunaitet Stet bilong Amerika (USA) we Yunaitet Stet Olimpik Komiti i sapotim dispela kos we Yunivesiti bilong Delaware i givim ol dispela kos.

Aninit long dispela, Kassman bai developim wanpela Spot Taekwondo Kosing Karikulum (STCC) bilong

PNG we ol kosa i ken yusim olsem developmen rot bilong kamap Bes Intenesenel Kosa (BIC).

Insait long dispela 5-pela wik kos, Kassman i stap tupela wik long Yunivesiti bilong Delaware na lainim ol samting aninit long planti het tok.

Kassman i stap long prektikal insait long wanpela wik long Lima Taekwondo Klap (LTC) long Virgina Senta na narapela tupela wik long US Olimpik Trening Senta long Colorado Spring.

Taim em i stap long USA, Kassman i painim aut ol rot bilong ol program i kamap nau na i makim long karim aut trening long Kosing Akreditesen bilong Spot Taekwondo (CAST).

Papua Niugini Olimpik Komiti i sponsa long dispela program na ol i bin stat long Septemba 17 na bai pinis long Oktoba 21.

Kassman i tok, trening em i bikpela samting long ol wok bilong Taekwondo PNG bikos i no gat stretpela pepa i stap long ol kosing ol bin mekim bipo.

“Ol pepa bilong kosa i ken helpim ol nupela na olpela instrakta long PNG bilong developim namba wan level bilong kamapim kwaliti Taekwondo etlit bilong yumi long ol rural eria long PNG,” Kassman i tok.

“Dispela em i stat bilong dispela program na wanem samting mi tingim long en em, ol kosa bilong PNG Taekwondo bai kamap long neks jeneresen bai skruim dispela.”

Kassman i bilip olsem, kamapim gutpela kosa em i bikpela samting bikos long kamapim ol gutpela etlit long spot bilong Taekwondo long PNG.

Seketeri Jenerel bilong PNG Olimpik Komiti, Auvita

Rapilla, i laikim Kassman long mekim gut long trening.

“Taekwondo em i spot we PNG i mekim promis long kamapim na em i gat inap

long winim laik bilong planti lain long resis.

“Edward em i memba husat i save givim inap taim long dispela spot na mi

strongim olgeta kosa na trenaim long wok bung wantaim Edward long dispela projek long kamapim dispela spot i go bikpela,” Rapilla i tok.



Kosa bilong PNG Taekwondo, Edward Kassman, i toktok wantaim Taekwondo etlit, Samantha Kassman, long taim bilong trening long Rio Olimpik Gems long mun Ogas, 2016.

Kisapai bai go long envairomen program long Japan

KEPTEN bilong PNG nesanel hoki tim bilong ol man long taim bilong 2015 Pasifik Gems, Milton Kisapai, em i memba bilong PNG Etlit Komisin i gat bikpela wari long envairomen we dispela wari i kisim em i go Japan long Intenesenel Yut Konprens na dispela em hap bilong Eksens Program.

Kisapai i save stap wantaim Spot na Envairomen Program bilong PNG Olimpik Komiti, i bin go long program long Japan i bin stat long Septemba 24 na bai pinis long Oktoba 13, we ol bai toktok long eduksen, envairomen na kalsa.

Kisapai i makim envairomen olsem bikpela eria we em i laikim na ol sabtopik ol bai stadi aninit long envairomen em wara, hajjin na senitesen.

“Mi bai go insait long envairomen program long Japan bikos dispela em i eria we mi save gut na dispela em i wanpela samting i stap namel long wari bilong mi.

“Mi tingting long lainim ol samting we mi bai kam bek na yusim long ol program we yumi i yusim nau long PNG,” Kisapai i tok.

Em i bin stap wantaim planti spot na envairomen program wantaim PNGOC strongim em we ol i luksave long em na tok orait long em long go long dispela konprens.

Gavman bilong Japan i givim mani long dispela program na aninit long embasi bilong, ol i salim invaitesen i go long ol ogenaisesen long olgeta hap long wol.

Kisapai bai lainim ol samting long envairomen sait i gutpela bikos em i bin skul long Marin Baioloji long Yunivesiti bilong Papua Niugini.

Konfrens bai kamap long planti hap long Japan na namba wan hap bai kamap long Tokyo.

Envairomen stadi grup bilong Kisapai bai go tu long Shimane na Kagawa.

Kasipai i amamas tu long go lukim Japan gen inap long em i bin go long 2012

long wankain program.

“Japan em namba wan ples long go lukim bikos ol i save i gat tredisenal kalsa bilong ol wantaim nupela teknoloji na neturel envairomen,” Kasipai i tok.

Pruaitch salensim ol Sumkar yut long tonamen

James G. Kila i raitim

TRESERA bilong PNG, Patrick Pruaitch salensim ol yut bilong Sumkar Iektoret long tingim bihain taim bilong ol na developmen bilong PNG.

Em i mekim dispela toktok long Mande taim em i bin stap long Karkar ailan long opim namba tu Sumkar Distrik Gems long Madang provins.

Moa long 5000 manmeri i bin bung long Kinim stesin long Karkar ailan taim Mista Pruaitch na wanpela grup bilong Nesanel Alaiens (NA) politikal pati i bin go long hap.

NA Pati i sapotim ol ogenaisa bilong spots tonamen wantaim K20,000 long dispela seremoni.

Dispela namba tu Sumkar distrik yut tonamen em bikpela tru we ol tim i kam long bikpela long Sumgilbar LLG na Karkar ailan long pilai spot. Ol yut i pilai salens long ol spot olsem soka, basketbal, volibal, tas ragbi na dat kompetisen.

Ol lida husat i go wantaim Tresera Pruaitch long Karkar ailan em Memba bilong Angoram, Salio Waipo, pastaim Sif Jastis na gavana

Samoa i daunim PNG

PAPUA Niugini Anda-20 netbal skwat i lus, 59-36, egensim ol Samoa long de namba tri bilong Osenia Netbal Wol Yut Kap Kwalifaia long Oklan, Nu Silan.

Samoa i stap pas long stat bilong resis na long taim bilong malolo, ol i stap pas yet wantaim 27-16. Samoa i kisim 32 moa poin long winim resis.

Ol PNG i mekim gut long namba tri na foa kwata bilong resis na i kisim 20 gol.

Long resis i kamap long Tunde, PNG i lus gen egensim Kuk Ailan, 55-42.

PNG i win long wanpela resis bilong ol 4-pela resis ol i bin pilai pinis.

Fainal bilong ol kwalifaia em ol bai pilai tude.

bilong Madang, Sir Arnold Amet, pastaim memba bilong Midel-Ramu, Ben Semri na NA Pati Seketeri, Joyce Grant na tu Karkar LLG presiden Ben Naing.

Minista Pruaitch i tok olsem gavman nau i givim moa luksave i go long developmen bilong ol yut na wanpela rot em long givim moa sapot long spots we ol yut i ken stap bung na pilai wantaim na

save long wanpela arapela.

Em i tok olsem gavman i lukluk nau long developim ol yangpela manmeri bilong tumora na bihain taim long go pas na lukautim na menesim dispela kantri.

Mista Pruaitch i tok gavman i bin katim K10 milien long wan wan yia insait long faivpela yia, na dispela i mak olsem K50milien long wan wan distrik long kantri.

Olsem na ol distrik mas luksave long spots na helpim.

Em i tokaut tu olsem Sumkar distrik em wanpela distrik long Madang provins gavman i bin sapotim gut long em mas develop. Olsem na em i salensim ol pipel long distrik long kamap olsem papa bilong ol developmen gavman i kamapim long helpim ol pikinini na tumbuna long bihain taim.



Minista bilong Treseri na Memba bilong Aitape-Lumi, Patrick Pruaitch, Seketeri bilong Nesanel Alains Pati, Joyce Grant, na ol narapela bik lain husat i bin go wantaim long opim Sumkar Distrik Tonamen i wokabaut i go insait long hap bilong toktok.



Milton Kisapai, husat bai go long Japan long Intenesenel Yut Konprens.



PNG Anda 16 pilaia i traim long abrusim pilaia bilong Nu Saut Wels anda 16 long pilai bilong ol long Mosbi. NSW i winim gem.



Ol pilaia bilong PNG anda 16 i bungim pilai bilong NSW anda 16.



Praim Minista Peter O'Neil i sekhan long Puara bipo long pilai i kik ov.



Blend Abavu i traim ran namel long Greg Inglis na Mitchell Pearce long PMs 13 pilai long Mosbi. Australia PMs 13 i winim pilai.



Ol bikipela fowod bilong PNG PMs 13 i bung wangepela fowod bilong Australia PMs 13.



Greg Inglis i pasim bal bipo long Minoga i kam long takolim em. Minoga i bin pilai strong tru.



Pilaia bilong Paga Panthers i traim long ranawe long pilaia bilong Hohola Flais long gren final pilai bilong NFS long Sande. Flais i winim Paga.



Kepten bilong Hohola Flais i kisim sil bilong ol long han bilong siaman bilong PNGRFL Sandis Tsaka.



WHITE TUNA FLAKES
DIANA White

WHITE TUNA
insait
K 2.20



Tasty and Flavourful White Tuna for Everyone!

Manufactured by:
RD Tuna Canners Ltd.

Ol Kapul i laikim PNGFA long kamapim traिम pilai

TAIM ol meri Papua Niugini futbal pilaia i mekim wok redi long bikpela pilai bai kamap, tim bilong ol man, PNG Kapul, bai go pilai long namba tu hap long 2018 FIFA Wol Kap Rasia Kwalifaia long Solomon Ailan.

Namba wan raun bilong resis long 2018 FIFA Wol Kap Rasia Kwalifaia em, ol Tahiti na Solomon Ailan bai pilai long Novemba 7 long Papeete.

Papua Niugini na Fiji bai stap sambai long raun wan bilong stes tri na tupela bai pilai long raun namba tu.

Solomon Ailan na Nu Kaledonia i redi long pilai poroman resis long Honiara long mun i kam.

Nu Silan i gat inap sans long mekim wok redi long 2018 FIFA Wol Kap we em i gat tupela bikpela resis i stap yet egensim Mek-siko na USA.

Tasol, ol Papua Niugini i laik kamapim ol traिम pilai yet bikos ol pilai i komplem pinis long PNGFA long kamapim sampela traिम pilai long kisim tingting bilong ol i kam bek long gem.

Wanpela top pilaia bilong Papua Niugini Kapul, Michael Foster, i raitim pas i go long pes bilong PNG Nesanel Soka Lig long sosel midia na i tok, Solomon Ailan i karim aut traिम pilai bilong ol gem i kam na PNG i no karim aut wanpela traिम pilai yet.

“Solomon Ailan intenesenel tim bai holim tupela poro resis egensim Nu Kaledonia. Long de 5 na 8 bilong mun i kam, ol bai mekim wok redi long namba tu hap kwalifaia. Dispela em i gutpela long tupela kantri wantaim long traिम pilai i go inap long taim bilong tonamen.

“Na, PNGFA i ken ogenaisim sampela poro gem bilong ol Kapul?” Foster i askim long sosel midia pes bilong soka.

Em i tok moa olsem, ol pilaia i nid long pilai planti long ol intenesenel resis na ol i ken kisim inap strong we ol i bin lusim long taim bilong OFC nesen resis i kamap long Pot Mosbi.



MIPELA YA: Mitchell Pearce bilong Australia PMs 13 skwat i apim han bihain tasol long ol i winim NGCB PNG PMs 13. Planti bilong ol sapota i bin go lukim pilai long bihainim ol pilaia bilong ol long NRL. Olsem long poto ol sapota i no wari long skoa taim PNG i lus, ol amamas long lukim ol pilaia kam long NRL long Australia. Poto Nicky Bernard.

Taim yu senisim nepi bilong bebi bilong yu Senisim long Sensi

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

